

ASO LULU, 20 IANUARI 2021

Na nofoia e le Fofoga Fetalai le Nofoa i le itula e 9:25 i le taeao.

Tatalo.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoaofaitulafono.

SAUNOAGA O MALIU

FOFOGA FETALAI: Ou te faasilasila atu ma le agaga faaaloalo le tuumalo o le Tofa FIU Loimata II, o le sa avea ma sui usufono o le Palemene mo le Itumalo Faaalaalafaga o Faasaleleaga Nu.1.

1. O le Tofa FIU Loimata II na ulua'i filifilia ma avea ma sui usufono o le Palemene mo le Itumalo Faaalaalafaga o Faasaleleaga Nu.2 i le Paeaiga Lona XII mai ia Me o le tausaga 1996 seia oo atu i le tausaga 2001.

Sa avea o ia ma sui usufono o le Komiti o le Maota, Komiti o Tulaga Aloaia ma Amio Taualoa ma le Komiti o Fefaatauaiga, Pisinisi ma Alamanuia i le tausaga 1996 seia oo atu i le 2001.

O le Tofa foi a FIU Loimata II sa avea ma sui o le Vaega Faaupufai e Puipuia Aia Tatau a Tagata po o le HRPP.

2. Ou te faanoanoa foi e faasilasila atu le tuumalo o le Afioga VAAFUSUAGA TOLEAFOA Ken Vaafusuaga Poutoa, o le o lo o avea nei ma sui usufono o le Palemene mo le Itumalo Faaalaalafaga o Lefaga ma Faleaseela.

O le Afioga VAAFUSUAGA TOLEAFOA Ken Vaafusuaga Poutoa, na uluai filifilia mai ma avea ma sui usufono o le Palemene mo le Itumalo Faaalaalafaga o Lefaga ma Faleaseela i le Paeaiga lenei lona XVI mai le tausaga 2016 seia oo mai le tausaga nei 2021 ina ua faamanava e le Atua lona valaauina.

Sa avea o ia ma sui usufono o le Komiti o Tulaga Aloaia ma Amio Taualoa ma le Komiti o le Vaega tau le Tamaoiga i le Paeaiga lenei.

O le Afioga VAAFUSUAGA TOLEAFOA Ken Vaafusuaga Poutoa o se sui usufono o le Vaega Faaupufai e Puipuia Aia Tatau a Tagata po o le HRPP.

Na tuumalo le Afioga VAAFUSUAGA TOLEAFOA Ken Vaafusuaga Poutoa i le aso 19 o Ianuari 2021 o lona uiga o ananafi.

Avea ia lou leo e fai ma sui o lenei Palemene mamalu e molimoli atu ai faamaisega ma faamafanafanaga i faletua ma nofo a alo ma aiga, aemaise o Itumalo e pele i o la finagalo ona o le toesea o Afioga i sui usufono ona o le valaau paia a le tatou Matai.

O le mea lea ou te talosagaina ai ma le agaga faaaloalo le mamalu o le Maota, ina ia tatou tutulai faatasi ma mo se minute se tasi e faailoa ai lo tatou faaaloalo i sui usufono ua tuumalo.

Na tutulai filemu le Maota mo le minute e tasi e faailoa ai lo latou faaaloalo i sui usufono ua tuumalo.

TUUNA ATU O PEPA

Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).

1. P.P.2020/2021 Nu.78, Lipoti Faaletausaga a le Faaputugatupe mo Tagata Matutua 2019/2020.
2. P.P.2020/2021 Nu.79, Lipoti Faaletausaga a le Faalapotopotoga o Eleele a Samoa 2019/2020.
3. P.P.2020/2021 Nu.97, Lipoti Faaletausaga a le Faalapotopotoga o Inisiua tau Soifua a Samoa 2020.
4. P.P.2020/2021 Nu.98, Lipoti Faaletausaga a le Iunivesite Aoao o Samoa 2020.
5. P.P.2020/2021 Nu.99, Lipoti Faaletausaga a le Faalapotopotoga o Mea tau Fale a Samoa 2020.
6. P.P.2020/2021 Nu.100, Lipoti Faaletausaga a le Pulega o Tupe Faava o Malo a Samoa 2020.
7. P.P.2020/2021 Nu.101, Lipoti Faaletausaga a le Pulega o le Suavai 2019/2020.
8. P.P.2020/2021 Nu.102, Lipoti Faaletausaga a le Pulega o Felauaiga i le Laueleele 2019/2020.

9. P.P.2020/2021 Nu.103, Lipoti Faaletausaga a le Pulega o Uafu ma Taulaga 2019/2020.
10. P.P.2020/2021 Nu.104, Lipoti Faaletausaga a le Faletupe o Atinae o Samoa 2019/2020.
11. P.P.2020/2021 Nu.105, Lipoti a le Komesina o Sulufaiga i le Tulaga o Aia Tatau a Tagata Soifua 2019/2020.
12. P.P.2020/2021 Nu.106, Lipoti Faaletausaga a le Faletupe Tutotonu o Samoa 2019/2020.
13. P.P.2020/2021 Nu.107, Lipoti Faaletausaga a le Faalapotopotoga o Faaputugatupe o Mavaega Tausi a Samoa 2019/2020.
14. P.P.2020/2021 Nu.108, Lipoti Faaletausaga a le Matagaluega o Faatoaga ma Faiga Faiva 2019/2020.
15. P.P.2020/2021 Nu.109, Lipoti Faaletausaga a le Matagaluega o Faalapotopotoga Tumaoti a le Malo 2019/2020.
16. P.P.2020/2021 Nu.110, Lipoti Faaletausaga a le Falemeli o Samoa 2019/2020.
17. P.P.2020/2021 Nu.111, Lipoti Faaletausaga a le Matagaluega o Mataupu tau le Va i Fafu ma Fefaatauaiga 2019/2020.
18. P.P.2020/2021 Nu.118, Lipoti Faaletausaga a le Komisi o le Toefuataiga o Tulafono a Samoa 2019/2020.
19. P.P.2020/2021 Nu.119, Lipoti Faaletausaga a le Matagaluega o Leoleo, Falepuipui ma le Toefuataiga 2019/2020.
20. P.P.2020/2021 Nu.125, Lipoti Faaletausaga a le Pulega o Fale ma Malae Taalo a Samoa 2019/2020.
21. P.P.2020/2021 Nu.126, Lipoti Faaletausaga a le Ofisa o Fuainumera Faamauina 2019/2020.
22. S.R.2021/1, Tulafono Faatonutonu o Puipuiga mai Aafiaga o le Tapaa (Laiseneina) 2020.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoaiga faaaauu i luga o le
faitauga faalua – Aso 2**

FOFOGA FETALAI: E tolopo Galuega a le Fono Aoao i le aso Fono ananafi ua maea ona saunoa le sui usufono mamalu mo le Itumalo Tu Taulaga i Sisifo. Ia, ma lou faaaloalo ou te tapa se isi sui usufono e tulai mai e saunoa mo le tatou Tala Faatatau Faaopoopo o le Tupe.

Ia, lea ua tulai mai se tasi o sui usufono mo Falealili. Malie le sui usufono mo Falealili Sasae, se i tulai mai le Palemia.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia):

Lau Afioga i le Fofoga Fetalai, a o le i amatalia le tatou galuega i lenei taeao fou, ou te tulai atu ma le agaga faaaloalo e faafetaia le Atua i lenei taeao, i le faafoi mai o tatou ma taitaiina mai le soifua lagi e mama e faaauau le tatou galuega. A o lea foi ua uma ona e saunoa e molimoli ai le agaga faavauvau o le tatou Maota nei i se tasi foi o tatou uso sa o tatou faitonu i totonu o le Maota lenei mo le manuia auiluma o le tatou atunuu e tusa ai ma lo tatou valaauina. Ua uma ona e faamaise i upu faamafanafana. E le gata o le faamafanafana o i tatou uma i totonu o le Maota lenei ua i ai le lagona faavauvau, ae faapea foi ona faamafanafana i aiga faanoanoa ona o le valaau a le Atua i le tama o le aiga, le Afioga i le alii sa avea ma sui usufono mamalu o le itumalo le fetalai ia Fiu Loimata faapea foi le Afioga ia Vaafusuaga Toleafoa Ken.

Lau Afioga i le Fofoga Fetalai, o tatou moomooga, ia maua se nofoaga mau o i laua i le ola e faavavau. O le a i ai nisi upu i le taimi e fai ai sauniga faamavae, o le a faapena ona to ai le matupalapala, le faaaloalo masani a le tatou Malo i Afioga i faipule ua tuua le Malo e tusa ai o le latou galuega o le faufauina o le Malo o Samoa. O le a tulai faaaloalo ai leoleo ma tatala le fua o le Malo o Samoa, le Tagavai, e faaalua ai le tatou faaaloalo i toe sauniga ma fai ai foi nisi upu faamaise a lo tatou Malo. Ia maua sona nofoaga mau i le lagi.

Ae o lou tulai atu ma le faagasologa o le tatou galuega, e momoli atu lau faamalo ia te outou o sui usufono foi sa saunoa i le aso ananafi. E faapitoa se upu faafetai i le Afioga i le Tama Matua na saunoa i lana toe saunoaga malolo manumalo i le aso ananafi, le Fetalai ia Faasootauloa. Sa outou faafogafoga i le saunoaga matagofie a le sui usufono mamalu ma ia taua ai, o le 1991 sa ulufale mai ai i totonu o le Maota lenei, o le sui usufono lea o le itumalo o Saleaula, na to i ai le latou faatuatuaga, ma ia tauave ai le tulaga o ia e auala mai ai le finagalo o lona itumalo, tupu ma ee o le itumalo.

O le tausaga lea 1991 na faatoa amata mai ai Paeaiga fou e tai 5 tausaga, sa tai 3 mai lava i le 1962, ona tupu ae ai lea o se manatu i le Taitai o le Malo ma matou sa i ai i lena taimi i le Kapeneta, ua tataua ia ona faaumiumi le taimi o le Nofoaiga a le Palemene mai le 3 i le 5 tausaga. Aisea? Ona e faigata ona faia ni atinae fuafuaga mamao e faagasolo faatino, faamaea i totonu o le 3 tausaga, ae o mea faapena, e masani ona sili atu i le 3 tausaga, vagana ni nai mea faapaole e puupuu le taimi e fai ai, e puupuu foi lona aoga e faavae i ai faiga filifiliga i mea nei o faiga palota. O le mafuaaga lena, e tiga ona le maua e le HRPP le 2/3 o le Palemene ae sa faatu pea le lafo e teuteu ai le tatou Faavae i luga o le talitonuga e tuu atu i le Atua o Ia na te tofia Malo, o Ia foi na te faatulaga mai manatu lelei i totonu o le tatou Maota i sui usufono, manatu lelei e faufau ai le Malo o lo o faavae i le Atua. Sa faatino lea fuafuaga lau Afioga a le Fofoga Fetalai e aunoa ma se atoaga, toe tasi lava

le sui e atoa ai le 2/3, peitai na maua lava le sui mai le Itu Agai, e ui ina matua tetee le Taitai o le Itu Agai i lena taimi, ae na fa'i lava e le Atua, na aumai lava e le Atua le mamoe e osi ai le taulaga, ina ia faatino le agaga lelei na faavae ai lea faamoemoe, lea la na maua ai loa le iuga ma faasolo mai ai loa nofoaiga tai 5 tausaga.

E i ai nisi e manatu o mea nei o teuteuga o Faavae, e le soona faia. O le taofi, e aumai lava e le Atua le mafaufauga e tatau ona teuteu ai ma fai ai le mea ua silafia e le Malo e tatau ona fai, aua le tuua.

Lau Afioga i le Fofoga Fetalai, ua ou taua lea tulaga, ona o le afioga i le sui usufono matua o le Maota lenei, i le 1991 i le 2021, ua 30 ai tausaga o auauna lenei tama i totonu o le tatou Maota lenei. O le a le feau o lo o aumai ai? E aumai ai i ina le faatuatuaaina e le itumalo o se sui usufono na te ave mamalu lona itumalo, aemaise o le Pule o Salafai.

Lau Afioga i le Fofoga Fetalai, o le mea lena o lea ou te tulai atu ai, 30 tausaga, e tai 5 tausaga, e 6 Nofoaiga a le tama lea ia Faasoo. E aumai ai i ina le feau taua mo tatou uma. O le sui usufono lava ia e tofofi mai e le Atua, e tele lona aoga, e faapena foi ona fulisia i ai le finagalo o le itumalo, ona o tatou tofiga o tofiga mai le Atua, ae auala mai i le filifiliga a le tagata ua musumusuina e le tatou Matai Sili, musumusuina e le Atua o lo o i totonu ia i tatou taitoatasi.

Lau Afioga i le Fofoga Fetalai, na o sina upu puupuu i le taeao lenei e faalaeiaiu ai ia saunoaga ina ia tatou tomanatunatu foi i ai i lenei taeao i le valaauina, ona fai mai le isi Failauga o le Tusi Paia, e 3 faamasinoga o tatou, o le faamasinoga e fai o lo o soifua pea. O lona uiga na ona valaau mai lava o le Atua, fai ma lou faamasinoga numera 2, ae ua uma lava ona fai lou faamasinoga a o e soifua pea. A o le taimi e te maliu ai, fai ma lou faamasinoga lona 2, na ona faamaonia lava o le faaiuga ua fai muamua ona totoe ai lea o le faamasinoga mulimuli e afio mai lo tatou Alii mai le lagi na te faia le faaiuga mulimuli o le faamasinoga o le iuga mulimuli, e tutusa lelei lava ma le iuga na fai i le faamasinoga 1, 2 ma le 3. A o le auau atoa o na mea uma, e fua i ai le faamasinoga o tatou, o le tatou galuega, ia fai ma le tonu a tatou galuega, ia fai ma le alofa.

Lau Afioga i le Fofoga Fetalai,
Ia o se upu puupuu lena i lenei taeao e amata ai le tatou taeao. Soifua ma ia manuia tele i latou ua filifilia e sausaunoa i le aso.

FOFOGA FETALAI: Malo faafetai. Faafetai i le saunoaga faa-Taitai ua manino i le faafofoga a le Palemene ma le atunuu.

Ia se i tulai mai le sui usufono mo Falealili Sasae, le Afioga i le Gafatasi, le Afioga ia Fuimaono Teo Samuelu Teo.

Afioga FUIMAONO TEO SAMUELU TEO (Falealili Sasae): Ou te manatu o ituaso ma aso faapenei, o aso o le pogisa e vagaia e iuleo o le alofa.

Ua tatou auai faatasi i le faafetai, o le faapolo ma le faasagi na saunia e lau Afioga i le Fofoga Fetalai e tea ai le matupalapala o le tatou Tapaau Sili i le faapolo ma le faasagi aua Lona agalelei ua taitai filemu mai lo outou soifua i lenei taeao. Ua faamalosia le tulai o le feau na momoli i le uso ua faailagi le folauga, faamanuia mai le lauga o lea o le a ou ta muamua i le taeao lenei. Peitai, o lea ua sola si alii ae le faalogologo i le lauga.

Ia, Vaafusuaga Ken, ia aumaia lou maui tapuai se i taumafai se ta upu, o fea lava le mea e gata ai, pe uma pe le uma le lauga, o taua lena.

Faafetai i lau Afioga i le Fofoga Fetalai, ua maua se avanoa o lenei itumalo e faaleo ai le agaga o le faafetai i lou itumalo pele o Falealili Sasae po o le Itumalo Faapalota Numera 2, aemaise foi o se agaga faafetai e molimoli aua le tapuaiga a tama sa o le talalelei i le nofo a faafeagaiga i le latou sa folafola, a o se faafetai e molimoli i nai ou aiga i Samoa i so o se tafa. Ae tatau foi ona momoli le agaga faafetai i le Afioga i le Palemia ma le Kapeneta, i alii ma tamaitai Minisita ona o galuega faatino ua afea ai lenei itumalo. O lea ua lalafu le tai o gogo ina ua faaae ona faiva sa tofusua i le alititai, ua faaae foi faiva o tavae sa mamanu ma mamae i fisaga o le lai, o lea ua sala utouto le muaga o malama sa malili faalogoiu. Ae o le mao nai le tinatoa ma le tinaava, se i tau ane se pua gagana mai logonoa, sa tuu aami le ua o malo nai le Fagalele. A le popoga nai le nuanua ma le sigano i le faleta, ua gaupaa i le matavai. O lea ua lulu le nafaifi sa toitoi mamate i le alovale ina ua gase le lafala sa saia i le lai ma le pisia o matagi, a o se tulele nai le tai lautasi. Ua ae i manu le vaatele sa i Olosama ua lele le lupe malie nai le mauga o Mataonea ma le liai nai le tiaseu o apimalie, ina ua tumalo le logo na aafi sa i filiaso ma le feao nai le Lafaaua. Talofa e i le pune sina na lalama i ututau ma le fultua faamaite i fanua mamala, e le tauiso le fisoa ma le aso piopio, o le fau ma le lapa, o le fueuli ma le auauli, a o ai ea e malolo i le tavaiuli? E faanaio le filofiloa ma le miomio, ina ua atuta e pei o upu e fai i le lagimalofie o Sua. Ou te taofi, gase ia i avaloa ma le tupua talivaa, le tufuee na mamafa i le taumuliava mataava ma uluelepapa.

Le Atua e, mai le mauga o Iakopo, le mataisau o le foafoaga, le Alii o le Filemu, le Tama o le faapalepale, le Tupu o le onosai, o Ieova lava Oe. Se ua tumalo lou alofa, ua gasetoa ae ola pule o lou filemu ia Samoa. O aomamala sa folau ma aitu ma le soifua laulala o le tagata, e le tusa ma lou finagalo. Le manava lilipi sa sulu i le vaaili, sa faatonu folau lau afio le Atua le Tama. E toele tulivae ma le ofo o le loto ina ua e taitai le sa o Samoa i ou manuia. Sa faigata e nai o tatou matua ma tuua ona tau faatoa ma tau faafoe, a lea ua tali la latou miti. Le Atua faafetai ua gagaifo le la ma ua sisiva ona ave i luga o le sami tioata ae atagia i uluulu o laau o lele ua toetiiti gotouga le 5 tausaga o le Paeaiga Lona XVI. Sa fetai Samoa ma mala faalenatura, o faamai e tele, o faafitauli sa fetuleni mai, ae sa e tu taumua lava i lo tatou sa ua manuia ai faiva o Samoa. Sa e musuia le tofamamao i le Taitai sa e tofia mai le lagi e tautai le sa o Samoa, ae o le fuifuivine sa faia mo le taulaga

e osi mo se Samoa manuia, a lea ua sasala le manogi i atunuu tetele o le lalolagi, e sili atu nai lo le litara. Le tofa loloto, le tofa faaea atunuu, le tofa alualumamao i le manatu alofa mo se manuia o Samoa aoao. O lo matou faatauvaava, ua e amanaia, o lo matou vaivai, ua e amanaia. O matou o auuana e le aoga i ou luma, ae peitai ua e silafia lo matou faatauvaava ae sa e faatonutonufolau i la matou faigamalaga, faafetai i le Atua. Ia tumau ia ia te oe le Viiga le mamalu nei seia oo i le faavavau. Ae aua lava nei ia te i matou, aua lava ne i ia te i matou le Alii e.

Taoto ia le tauluulufau o Satuala, na tonufia ai lalago o le folasa na sasamo ai le tauaifuefue. Taoto le faugagana o le Lilomaiava, na siisii manee i malae o tanifa ma le motumotutoa ma foafatu i maa. Taoto le fauula o le Tuiatua na lefulefu ai le sigano laufasafasa i le faga o Oloula, o taeao na o Samoa. Ua faafagogotagiao i le faafofoga, e ui o le povalea ae sa mate i lima faiva o Pausisi. Taoto le malama na talitali i le utumalie i Mataniufeagaimaleata. Taoto le fagafua na logopapa i Faleu ma Utuagiagi, taoto le osogavasa i Falaulananamu ma le Laupulaa i Malaeola ma Gafoaga. Taoto le faatafetafega nai le vai o tausala i le Vaotuitui ma le afi a Tiitiatalaga i Niniva ma Punialavaa, Fogalevai ma Fagaiava, Pilioua ma Fatuoletolo. Ua ao Samoa, ua sapi le ositaulaga, ua olioli le faitaulaga. O taeao na o le Talalelei. Na alaga Ioane le papatiso, ua malu ai tupua ua malu ai maota, ua malu ai laoa fetalai. A o le taeao sili lenei, ua fesagai tupu o le atunuu, e le gata o tamalii a o le au tootoouli ma le au fueloloa, i le Maota mauuluga e fai tonu a Samoa. Malo faafetai. A o le fetalaiga a Iesu i lana lauga faaamua i le mauga, “Amuia e faatupuina le filemu aua e fai mo latou tofi le nuu. Amuia e loto mama aua latou te iloa atu le Atua.”

E faatulou i le paia i le tafatolu o le ta Faigamalo, aua o lea ua ututau le toelau i le matamatagi i Mulifanua. Tulou le afio o lana Afioga i Le Ao mamalu o le Malo, lau Afioga Tuiaana Tuimalealiifano Vaaletoa Sualauvi II ma lau masiofo. Tulou le afio o le Sui o le Fono a Sui Tofia ma lau Masiofo, lau Afioga Le Mamea Ropati o le alo o le Tuiaana Sagate, vae ane mamalu o Tapusatele o le alo o Salamasina, o le uluai tupu tafaifa o Samoa. Tulouna le susu o lau susuga i le Palemia lau susuga i le Alo o le Malietoa, lau Susuga Tuilaepa Sailele Malielega, vaeane mamalu aua Fatialofa ma le Auelua o Tama Punefu aemaise le laaunafausia, Taitai o le Maota. Afifio Afioga i alii ma tamaitai Minisita o le Kapeneta.

Tulou le afio o lau Afioga i le Fofoga Fetalai o le Maota, o le pao ma le vavao aemaise o sui usufono mamalu uma o le Palemene, lea ua tititonoa aua le Maota Fono i le Fonousu i lenei taeao.

E faatulou foi i le afio o lau Afioga i le Faamasino Sili, lau Afioga Siatu Simativa ma Faamasino o le Faamasinoga o Soligatulafono. Tulou le afio o lau Afioga i le Peresetene, lau Afioga Fepuleai Attila Ropati ma Faamasino o le Faamasinoga o Fanua ma Suafa.

Afifio o Ofisa Sili o Pulega o Matagaluega a le Malo, Pisinisi Tumaoti. Tulou Tama Sa o le Talalelei i so o se Fatafaitaulaga, o lo o faapunapaulia i nuu ma alalafaga. O lalagi le u ma faafuata le tao o le upu a le Atua, aua se manuia o Samoa ma lona Malo Tutoatasi.

Tulou ia Galuefa aua Tama ma o latou Aiga, o Aiga ma a latou Tama. Tulou aiga e tele e tausii e Tumua ma Pule, Ituau ma Alataua, Aiga i le Tai ma le Vaa o Fonoti. Tulou lau tapuaiga mamalu Samoa mai lava i ona ao i mauga tetele seia oo i mauga iti.

Tulou le tapuaiga a le Faigamalo a o tatou uso i Tutuila ma Manua. Afio lau Afioa i le Kovana sili ma le Lutena Kovana o Maota e lua. Tulou Tama faasau ma Tama o le fuafuataga. Tama matutua ma tootoo o le faleagafulu o Sua ma le Vaifanua, Fofu ma Aitulagi Saole ma Saleaamua ma le Launiu Saelua. Upu o le ituau malosii ma le Alataua. Tulou le laaau na amotasi ia Samoa, aua Faatuiolemotu, Pulafano ma le Vaimagalo, Samatuafaiga le faletolu, Saite, Sapua, Sasialei ma le Faleifa, le auvaa o tootoo o le faleula tau aitu tau tagata ma upu ia te oe le Manuatele. O paia apoapogata na o Samoa, ou te toele ma ou faatulou i ai.

Talofa e, i le tapuaiga mamalu a lou itumalo peleina Falealili i Sasae ou te mitamita ai, ou te nene ai, ou te matanana ai, e ifo i ai lou fia fai measili, e toto i ai lou fatu. Tulou le paia maualuga o Sa Fenunuiavao o oe o le talamoa ma le suauu matua i nuu lelei. O le pule i nuu tu aua tama faalagia. Tulou Tama Sa o le Talalelei o auauna faauuina a le Atua, o lo o faanonomanu i le nofo a Ekalesia i totonu o le tatou itumalo. Tulou ia le afifio o Sa Fenunuiavao, Fuimaono o le Gafatasi ma ou alo tutusa, afio Lesiolagi o le Saoao, afio Sefuiva o le matualii, alalatai lau fetalaiga le tofa i le Igoamatua Tofuaiofoia, Sa Taeleava ma le Fuaiala.

E faatalofa i si ou nuu o Utulaelae aua le afifio o Muagututia, Seugalii ma Tufugafale, tainane le alalatai o le faletolu.

E faatalofa atu i si ou nuu o Sapoe aua le afifio o alo o Samalaulu, Matuaao Taala ma Afegogo. Afio le matua o Alalatoa, alalatai Faatili ma le Faleono. Alalatai Gaopoa o le tulafale a le Tuiatua, ma lau fetalaiga Letoga Ulupuaa o le na faialaga.

Tulou le afifio o le paia o si ou nuu o Salesatele, aua le afio o Tapusatele le alo o Salamasina ae tainane foi le afifio o ou alo Alaifea ma Faleafaga. Afio lau afioa i le Aloalii Paitomaleifi, afio alo o Leilua, Sialeaga ma Fonoti. Alalatai le tama Malaelua, alalatai le aiga Talimalama. Susu lau susuga Leota alalatai le matua o Tama Malaelua, ae tainane foi le aiga Talimalama ma le nofoalo.

Tulou le afifio o le Taofia a moe Talalelei, Togialupe Teo ma Meleisea, alalatai le taufa, talitoelau le sasala a le mosooi Taelega ma Lauao, le nofoaituaiga ma le Lauti na Laulelei. Tulou aualuma lealea o tausala ma augafaapae o le itumalo, tulou le aualuma o tane o le itumalo. Tulou le tinifu ma le foaga o le manuia o Falealili. Le au puletua o Falealili i Sasae mo a

taeao. O ou paia na o sa ma faigata ma aotu tafaitoa ma tafaitia, o si ou itumalo peleina o Falealili i Sasae, ou te palelaei ai.

Ua ite fanua a lalo, ua tafa ata o tauleleia ua tino le agaga o le tautua ma le fia auauna e saili malo mo lo outou paia maualuga lou itumalo e. E avea lenei avanoa e molimoli atu ai mai le taele o lou loto, lou agaga faafetai. O au o la outou tama anamanava, sa e momoli mai lou faatauvaa i le Maota lenei o le Fonousu a le Palemene o Samoa. E fai au ma ou lima, e fai au ma ou vae, e fai ma ou fofoga, e fai ma au auauna e momoli ma faaleo lou finagalo ma ou manaoga i le Malo, ma ou taina le fautuulima aua lau ava taumafa. A, pale ua pale, ula e ua ula, titi e ua titi ona o lo outou faaeaea. Ua outou faatietie au i le maasalafa e fai au ma meafaigaluega. Ua faamalo faafetai le tausi tapaau, ua faamalo faafetai le fai alii. Ua faamalo faafetai le fai tama, malo faafetai le fai uso fai tuagane. Ua faamalo le fai atalii, ua faafetai faafetai faafetai tele le tatalo ma le loto faamaoni. Sa outou tu'i le mulipapa feula le mulila ma faanonomanu a o alo faiva la outou auauna. Faafetai i le tofa aonuinui ma aosisili, le tofa sa faaoloitoa ma faaoloifaiva. E faafetai i le faautaga saili ma le faitau totoa i lou itumalo.

E tapa siuloa ae saili i atulagi se manuia o faiva, ua faafetai tatalo i Tama Sa o le Talalelei. E lagona lava i ou tino, le pai mai o le alofa o le tatou Atua aua lo outou nofo tatalo. Ona o a outou talosaga molia i lea aso ma lea aso, ina ia maua se ai o Falealili i Sasae i lenei Paeaiga. Le Atua pulepule tetele, to faauaga ana faamanuiaga aua lo outou paia maualuga, si ou itumalo pele.

Talofa e i aiga e fia, se ua taunuu le upu o le Salamo a Tavita, se ua e ave au i le faleuaina, o le fua ua i ou luga o le alofa lea. Ua e le tuuina au nei i le fuagasaito, a ua e tuu au i luga o le tutugalamepa ina ia susulu atu i e o i fale uma. O la outou pule lea. Faafetai le alofa moni, o le ala lea o le sisi o lou faamalama ma ou vaavaai atu, o aga ia a le Isaraelu moni. O le tatalo a lo outou auauna o lena ua folasia i luma o le Malo, tatou talosaga mo se manuia o si o tatou itumalo. Ua i ai le lagona, o le mea e lelei i Apia e lelei foi i Falealili. E tatalo atu ai i lou itumalo, e tau le tolaulaua galuega faatino a la outou auauna. Ae e i ai le talitonuga, o le upu faa-Peretania, "Actions speak louder than words." E taua galuega ae le taua upu, e le tau tolaulauiona. Ae ua outou silafia ma outou molimauina galuega na faatino i lenei Paeaiga. Ia to maia lau pule e faaauau ai galuega, e fia faauma a lo ta itumalo. Ae ia manatua, o le upu a le toeaina o Alema i le tusi, o se tasi molimau ia Iesu Keriso, fai mai, "ia filifili faatasi ma le Atua i au mea uma e te faia." Ioe, a e taoto i le po, taoto ona o le Atua ina ia leoleo o Ia ia te oe i lou moe. A e ala i le taeao, ia tumu lou loto i le faafetai i le Atua, afai foi e te faia ia mea, o le a faaeaina oe i le aso o le gataaga. Aua o outou manatu e le o manatu na o le Alii. E faapena se lagona o la outou sui usufono, filifili ma le Atua, aua ne i avaga le tofa i ni faasalalauga o ni faatosina, a ia e filifili totoa ma le Atua. Aua e tofi mai e le Atua le tofi mo Falealili i Sasae. Ae ou te talitonu, I'll be back.

Ia, e le faaititia le agaga faafetai i uso o lo o sii lo latou aao e fia tautua, o le upu moni sa outou faafofoga lou itumalo, sa ou matau, o le agaga maualuga ia i latou o se manuia mo Falealili. O aualagalue, faaleleia o faleaoga, o le suavai, o le eletise, o malaetaalo faava-o-Malo. E tatau ona faatepa lo tatou itumalo, na toe faafoi le tupe na tuu e fai ai le ta malae faava-o-Malo, ua fiu e saili se fanua i lo tatou itumalo. Ua uma ona fono ma le tatou afioaga i Salesatele e leai se fanua, faapena Siuniu, faapena foi i Ituvai. O le fono faalua a le tatou nuu i Salani, ae faasino mai ai le fanua i uta i le aualagalue, toetititi lava 10 minute e alu i ai le taavale. O lona uiga e oo atu e taaalo tamaiti ua tagi alisi. O le ala lena o le toe faafoi o le tupe, lou itumalo e. Ae a faapea e maua se fanua, o la le lava e avanoa le tupe mai le Matagaluega o Aoga, ua uma ona aveese e le Minisita, o lea e molimau aua o lea e le o i i. Ae ua uma ona to mai lana pule, ae faatasi ai ma le seleni e faatino ai le malae lena. O lona uiga o lo o faatali le tatou Ofisa ma le Malo, o fea le fanua e fai ai le malae lea. Faafetai i lo outou lava papale, ou te talitonu, o le tagi foi lea o lea o le a tagi ai sui o lo o fia tauva. Ona o le faaleleia lava o aualagalue, o faleaoga ma le faatuina o le falemai. A o le pese foi lea sa pese ai la outou auauna mai lava i le 2016 seia oo mai. O lona uiga, e ui lava ina eseese fati, a o le pese lava e tasi. O le a la le mea o le a toe sui ai se fati, o lea lava e lelei le lagiina o le pese a Falealili.

Ia, faafetai i le Malo, na o sina faafetai puupuu i lau Afioga i le Palemia ma le Kapeneta, ou te talitonu, o au le isi sui usufono e faatiga fofoga ia te outou ona o lou alu atu soo i mea e manaomia i lou itumalo. Ae faafetai ua tali, lou itumalo faafetai o lea ua uma ona fua atu le ta auala. O le auala alo lea e faaoga i taimi o faalavelave faafuasei. O lea ua uma ona fuatia i Salesatele seia agai atu i uta i fale e gata ai e o nonofo ai. O lea ua i luga nei tatou i le tulaga o le tauofoga e faatino ai le auala lea. Utulaelae, o lea ua i ai tatou i le auala, e faatino foi le tatou auala lena i le tausaga lenei. Ona oo atu lea o le tatou faasologa i tatou aualagalue. Ae e i ai le faamoemoega, o galuega na e faatino e la outou sui usufono pe a toe foi mai e faaauau le galuega.

O le tatalo a lou sui usufono nei, e tau na faatepa o le tuualalo, aua nei tetena i le faafofoga a lo tatou itumalo aemaise o le tatou falelua. E matau ma le totoa, talofa e, o le tatou tama, e le soona siia le fala, o le afioga i le Tupua. O le Tama a Aiga, e faamemelo i ai aiga Sa Fenunuivao. O lea o lo o matamata ma maimoa mai le tina o Tupua ma lena foi afioaga. O le tatou aiga, ae matau atu, aua nei avea lo tatou nauta manumanu i le faavae o lo tatou nonofo ai, manumanu i le upega. Aua tatou te naunau i le ia. O le ala lea o le tuualalo atu ai, faafetai.

Na ona ou toe faatepa o si o tatou itumalo aemaise o le tatou nuu o Salani, avea le ta Tama a Aiga ma Taitai e agaia le Malo. Ae sa taumafai mai afioga ia Fuimaono, na tulai mai le afioga ia Fuimaono e lagolago le Malo le afioga i le Gafatasi, Fuimaono Lotomau, na iu ai ina pale i le Minisita. Na tu mai lo tatou Taitai lo tatou Tama a Aiga tatou te faamemelo i ai, e agaia le Malo,

seia oo mai ina tulai mai Fuimaono Tei e agaia le Malo, ae tu atu Fuimaono Faasopo e lagolago le Malo. O lea foi ua ou tulai mai e lagolago le Faigamalo, o lea lava e solisolimulivae i auala, na to mai ai le pule ma le tofa i le paia i aiga. O lona uiga, e le o se mea fou le eseese o tatou lagona. E le o se mea fou le eseese o tatou manatu, i ni tulaga e faatino, a o le fua taualuga, e leai lava se mea o gase. O lo o mamalu pea a ta tu ma ta aga, aemaise o le tausiga o ta Tama a Aiga. Ne i alu loa se faamatalaga a Falealili ae le tele se tala, o lona uiga faamolemole, lou itumalo e, o le tala lena a Falealili. Ia tausii le mamalu, ina ia mafai ona ta maua se Faigamalo. O ata na o le temokalasi, manuia ma le manino, e saatu lava le lagona o le tagata ia i le mea e agai i ai lona finagalo. O lona uiga e le faatonutonuina, e le paoina e se tasi lou finagalo, aua o lau filifiliga saoloto.

Susuga Hon Laauli Polataivao Leuatea (Gagaifomauga Nu.3): Lau Afioga i le Fofoga Fetalai, se mea e faamalamalama ma faasao lau Afioga.

FOFOGA FETALAI: Malie le sui usufono se i tulai mai le sui usufono mo Gagaifomauga Nu 3.

Susuga Hon Laauli Polataivao Leuatea: E manatu o lenei itula o lea lava ua faamanusina le tofa a lau Afioga i le sui usufono, lau Afioga i le Gagatasi Fuimaono. Ae tau lava ina ou piipiiama lau Afioga i le Fofoga Fetalai, ona o le puipuiga o le mamalu o tatou Tulafono Tumau. O lea ua agai le saunoaga agai i le taua o suafa e le mafai ona tali mai i saunoaga ma tuleiga. Fuimaono, na ona ou valuvalusia aa o le fau po o fea le tofa, o lena e faamanusina. O upu o le va nonofo o le tama ma ona aiga, e o o le vao. O la e tapuai mai le nuu, o la foi e malamalama le mafuaaga o le masii atu o le fala siigata o le Tama a Aiga. E le i falala fua le niu, ae na ona ou piipiiama, fale upu o le tatou va nonofo. Fuimaono i ina, Fuimaono ua tapena mo le tofi, o Fuimaono foi lea e tautala atu. E ava tele, ae aua ne i puaina i vao ma liaina i ala le mamalu o le Tama a Aiga. O le tama tatou te tausii. O lau faapai atu lea ma le agaga faaaloalo, faamanusina pea le tofa o lena e lelei. Ae aua nei avea mea e agiga i ala upu nonofo o le tatou tausiga aua le tama lea. O lau fesoasoani atu lea, e le mafai ona tali mai le Tama a Aiga i le mea na ala ai ona afio i tua. O le finagalo o le nuu.

FOFOGA FETALAI: Ua maua atu le faauilavea, se i tau fesoasoani atu foi le Nofoa. Ua televave foi le tulai mai o le Afioga i le sui usufono mamalu o Gagaifomauga. Se i saunoa mai le sui usufono.

Afioga FUIMAONO TEO SAMUELU TEO: Faafetai. Ua faalavelave fua le sui usufono e leai lava se mea o gase. O lea e tuualalo i lou nuu ma le itumalo, i le va nonofo. Ae ou te iloa foi e le o manino foi i nisi vaega i tua

atu, ae o lou nofo ma ou manino lelei, leaga sa ou saofai ai i le faigatonu, o la foi ou te saofai ai i le faiganuu. A o le tuualalo lena e ave, e leai lava se isi o tatou e le pai tino pai toto. O le tatou tama e faamemelo, a lena, o le ala lena tatou te puipui ai ma ave le tuualalo, ia aua nei faataitaia i le ala. E leaga o le tama e faamemelo uma i ai tatou. O le tuualalo lena, e le o se agaga foi lele po o se tualga e...

Susuga Hon Laauli Polataivao Leuatea: Lau Afioga i le Fofoga Fetalai, ou te toe tulai atu lava i le ava ma le faaaloalo. Aua ia le liaina i vao ae puaina i ala, e o o le vao, o le Maota lenei o le atunuu. Ia tuu upu faa-Salani o la e taatia le maota e fai ai. O la e le o mafai ona gagana mai le Tama a Aiga i le mea na ala ai ona afio i tua. O manatu ma lagona na, Fuimaono, tuutuu mamao le tofa o lea e faafofoga Samoa.

Afioga FUIMAONO TEO SAMUELU TEO: Ou te iloa a faapea e maua mai le tuualalo lea, afai e mamae le tavae i ona fulu. O lona uiga o le saunoaga e mamae oe ae le naunau au e puipui i le Tama a Aiga. O le ala lena, a o le nonofo ai, e faapena, leaga e puaina tala, o le ala tonu lava lena. E leaga o lea ua faaalu i luga o le ea, e pei e foliga ai, ua faaoga le Tama a Aiga e uunai ai se savali. Ma le agaga faafetai, o le ala lea.

Susuga Hon Laauli Polataivao Leuatea: Lau Afioga i le Fofoga Fetalai, e i ai lou manatu e faamalamalama o lea e faafofoga le atunuu. E aua le ninia faatasia le mamalu faale-nuu ma mea faapolokiki. E le o le auala lena, e le i faia i le auala upu sa fai i le maota.

FOFOGA FETALAI: O le mataupu aua e pei o lea sa toe faamanatu mai le faasologa o augafaipule i futia ua sola. E pei e faapena se lagona o le Fofoga Fetalai, e le faapea e tuu atu le avanoa ona o lea e sao lelei le saunoaga a le sui usufono mamalu, i le mea na faasolo mai ai sui usufono i lena vaitaimi o Falealili. O lea la e pei ona taunuu mai, e leai lava se eseesega o lena foi vaitaimi ma lenei foi vaitaimi. E pei e faapena le uiga o le saunoaga a le Afioga i le sui usufono o lo o saunoa nei. E aoga foi le tulai mai se i fautua foi ma aumai se mea o e finagalo oe i ai. O le tama lava tatou te tausi faatasi, e pei e faapena se lagona, ae e le valetuulima foi i le tausiga a le Nofoa le tulaga o Tama a Aiga. E tofu magalafo e iloga malalaola i le atunuu. Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ou te lagona e oo loa i mataupu ia ogaoga, e tatau foi ona tuutuu loloto le tofa ia i tatou nei i totonu o le Maota. I lau faalogo e taua tele le tuualalo le fautuaga, e le taofia i tatou mai le fai o se fautuaga, sei vagana ua

faitio. A o le fautuaga tuualalo na e avatu e le Sa Fenunuivao, o le sui o Sa Fenunuivao i le latou tama. O au o Sa Fenunuivao, o au foi o Sa Fenunuivao. O lea foi la ou te matua talia lelei le fautuaga lea e aumai. E na ona ou faamanatu atu i le mea lea o le osovale i totonu o le Maota lenei. Ae sao lelei le fautuaga, o lea e fia faalogologo, o le fautuaga e le o se faitioga.

FOFOGA FETALAI: Malo faafetai, o lea ua manino le auofala.

Susuga Hon Laauli Polataivao Leuatea: Lau Afioga i le Fofoga Fetalai, o si mea e fia faamalamalama...

FOFOGA FETALAI: Malie le sui usufono.

Susuga Hon Laauli Polataivao Leuatea: Toleafoa, o aiga sa Tupua nei e tausii foi i le tama lea. A nafa nafa tama tala le gafa e u lava tau i le pau. O le ala lea, o le fautuaga lea e ave i le Gafatasi, fai upu a lo tatou nuu i elelee, aua le faatasina, e le mafai ona saunoa mai le Tama a Aiga po o le a le mea na ala ai ona afio i tua. O le ala lea o lou piipiiama, e eseese lagona o tagata i le tama lea. E leaga e i ai isi tagata e fasi pipii, e i ai tagata e pipii mau ma atoa le pipii.

FOFOGA FETALAI: Malie le sui usufono se i alala mai i lalo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: E i ai foi tagata e pipii faavalevlea. Lau Afioga i le Fofoga Fetalai, o lea ou te tulai atu ai. A tala tala lava, e le gata o au o le tulafale a Tuiatua a o au foi o Sa Fenunuivao. Ua uma a tatou faamasinoga, uma faamasinoga, toe tasi lava le aiga lea e totoe o le Tuiatua, toe lava o Sa Fenunuivao. Afai la e saunoa Sa Fenunuivao i totonu e tatai ai, ae o le tu mai o isi e le o i totonu o le aiga Sa Fenunuivao o le ala lenei ou te tau agai atu ai e faufautua. Ona e toatele tagata e tautala i mea ia ae le o malamalama.

FOFOGA FETALAI: Malo, e i ai le manatu o le Nofoa, ia malie le sui usufono.

Susuga Hon Laauli Polataivao Leuatea: Lau Afioga o le a ou pule i lou loto, e ui o lea o lo o tapuai Samoa. Samoa faamasino outou po o ai e au lona gafa i mea ia.

FOFOGA FETALAI: Ua ou manatu tatou te le vailiiliina lea tulaga, e sa i le Palemene ona tatou oo i ai. Ae o tulaga latou o le faamanatu, ma e ala i fautauga se lagona i o tatou itumalo. Ina ia faapena ona tu i le too ma silasila

i le ata. Aua foi ne i seetia gofie i le tulaga o lo o i ai foi lenei vaitau o le vevesi. Ona e mafua mai i le tatou faigapalota. Ona e eseese finagalo e pei ona i ai. O le mea la lea, se i tulai mai le sui usufono, pe i ai se isi fautuaga ae faamaea mai.

Afioga FUIMAONO TEO SAMUELU TEO: Ou te iloa e manino lelei lava, o le faataotoga o le ata ua uma ona taunuu. O mea ua faamaumauina i le tatou Tulafono ma faamaumauina i faamaumauga a le Fono lenei. O i latou na tulai mai i le foe e taitai ma i latou o e na agai. E leai lava se mea o sala ese ai le lagona, ma le manatu o lou nei sui usufono. E ui o lea, ta te musu e talatala ia mea, e le o oo i ai. A faafefea la ona fai mai e faafofoga. O lea ua alu i alaata, ua alu i alaleo, a o lea lava e nofonofo e le o i ai lava se pisa o le sui o Falealili. Aisea? E olo lava le fua ma matau lelei, a o lo o faasaoloto lava tala e ave, o mea e ave. O mea manino na o lea e faafofoga le lalolagi i upu na lafo ma tala ua ave. Ae ou te le taea, e pau lava le agaga na ou faapupula i le vaega lea. O le tatou nuu, e fai lava le filifiliga a le tagata, leaga e le o se mea fou o le mea ua leva ona sau ai, o le Fuimaono e agaia le Malo o le Fuimaono e tulai atu e lagolago le Faigamalo. E le o se mea fou la, o le ala lena o le tau faapupula le vaega lea, ia ma le naunau ina ia tausi lava le mamalu. Ia, foi mai le leo o Falealili.

O le tulaga i totonu o le tatou Maota i uso a sui usufono, malo faafetai. O lenei 5 tausaga, se ua tatou militino ua milialafau, ua masani a tatou upu. E oo foi i si ou uso lea na faalavelave, ua masani. Aisea? Se e tafafao a tama a o le uso. E auga a tatou polokiki ma lauga e fai i le Maota lenei, se a o le va nonofo o Samoa e taua, o le va nonofo o le va tagata, o le faaloalo. O le ala lena. Ia, tatou saisai ia ma lafoai ni taufaaleaga, tatou fultua ia ma motusia maea o le fetotoai, tatou tuli lo tatou ai aua se manuia o Samoa. O galuega e faatino mo le manuia lautele ina ia mafai ona ola fiafia tagata o Samoa. Na ona ou toe faamanatu, leai, ne i avesese, o lau aiatatau, o lena e i ai lava lau aiatatau, e le o aveesea, o lo o tumau foi ou fanua faaleaganuu, e le o aveesea ma le o pulea e le Malo. Ne i te i ua femoumouai pe fetotoai lagona o le tatou itumalo. Leai. Ae ou te faafetai atu Salesatele, Siuniu, Sapoe, Utulaelae mo lo outou taliaina o le Tulafono e pei ona outou amanaia ai lo outou sui usufono, aemaise foi o ou aiga ma i latou uma i le tatou nuu i Salani. Ia, o le ala lena o le tau avatu o le lagona, e le fou, a o lo o tumau lava le fealofani ma le fetausiai o Aiga Sa Fenunuivao.

Ia, foi mai se faamatalaga a Falealili, manuteleina lenei aso aua tiute ma faiva, faafualoa e le Atua lou soifua le Taitai o le Malo na tofofi mai le lagi e toe taitaiina le tatou Faigamalo i le Paeaiga Lona XVII.

Ia faamanuia le Atua i lau Afioga i le Fofoga Fetalai, ioe, o lea lava o le a foi lou sa, ae momoli le faafetai tele i lau Afioga i le taitaiga e le faigofie le Nofoa, e le faigofie le paopaina o le tofa, a o le tau faatonutonuina o

faautaga a sui usufono o le Palemene, ae malo toa, malo faatoeaina, o lau faafoe lena e manuia ai faiva o le Palemene lenei i totonu o le Maota.

Ia alofagia e le Atua galuega faatino a Ofisa Sili o Pulega, e faitonu le Palemene ae faatino outou. O lona uiga, o le manuia o le atunuu lena e i outou aao, ia to mai le lagi le tofa ina ia mafai ona faafulu ai la outou pa e faatino ai outou tiute ma le faamaoni, aua e auga tofiga ae faamuamua le faamaoni i le faatinoina o tofiga ona manuia lea o Samoa.

Ia o le tala lea ma le agaga faaaloalo e toe avatu ai faamaisega, Vaelaa le faletua o Vaafusuaga, aemaise si ou afafine pele.

E momoli le agaga faafetai. E tele nisi tala i se taimi mulimuli mai, ae faamaise le agaga o le Atua i le itumalo, faamaise le agaga o le Atua i Faleaseela, aemaise o le afioaga o lo o tulai mai ai le sui usufono, ua aveese lenei toa o le Palemene. E misia oe uso, ia maua sou nofoaga i le lagi. Alolofa atu i o tatou matua o lo o i lena itu o le veli, faatalitali mai po o ai nisi o le Palemene e muamua atu po o i latou foi o Ofisa Sili o Pulega po o ai lava, a o lo tatou iuga lava lea.

Ia, tele so tatou manuia i le suafa o Iesu Keriso. Amene.

Na faaalialia le agaga fiafia o sui usufono o le Palemene i le maea ai o le saunoaga a le sui usufono mo Falealili Sasae.

FOFOGA FETALAI: Malo malele. E le tau faafuluina le saunoaga a lau Afioga i le sui usufono mamalu. Ua logo faafofoga le Palemene, ua logo faa-Tutuila foi le tapuai mai a le itumalo.

Ia, tatou te le tau laeia leaga e le tau laeia le toga lelei, e le tau paopaoina foi faa-tupe e fai ai o le taulafoga le maaosofia, ae malo faafetai le tofa. Ua matou fia faalogologo ona ua atoa le lauga a le atunuu. Malo faafetai. Sa tatau ona e alu e ave lau gagana Samoa. E le tau faafuluina, amuia lo outou afioaga o lo o tulai mai se sui usufono e faapena ona faamanuia i ai le Atua i le gagana.

Ia, ma ua i ai le manatu o se isi sui usufono e tulai mai ua oo i ai le tatou faasologa. Ia, tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ou te vaavaai atu pei ua faamalieina le toatele o le Maota nei i le tuleiga ma le saunoaga, a o lea foi ou te vaai atu ua ta tonu lava le taimi o le tatou malologa. Ae pe sili ia ona tuuina atu le avanoa e tapena lelei mai ai le o le a sosoo, ua talilelei le faaaloaloga a lau Matagaluega.

FOFOGA FETALAI: Malo. Ia, o le a faapea ona fai. Leala, o lena e te fia... Po ua e fia malolo?

Tofa Lealailepule Rimoni Aiafi (Faleata Sisifo): Faafetai lava lau Afioga leaga o lena ua faatu le lafo a le Afioga i le Palemia.

FOFOGA FETALAI: Ia, faafetai. Ia, ona o lea ua faatu mai ina ia tatou malolo e tapena lelei mai ai pe a tatou toe taliu mai i le tatou malologa. Ia, o le a faataatiaese Galuega a le Fono Aoa mo lana malologa masani.

Na faataatiaese Galuega a le Fono Aoa mo lana malologa masani i le itula e 10:33 i le taeao ma toe faaauau i le itula e 11:28 i le taeao.

Na toe faaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasilasila atu ua toe amatalia Galuega ma Taulumaga a le Fono Aoa Faitulafono.

Malo le onosai malo foi le tauatai i le tatou galuega ua maua le malosi faaopoopo e faaauau ai le tatou Fonotaga.

Ua ou manatu ua logoina mai au e le sui usufono mo Salega Sasae e fia maua sona avanoa pe a taliu mai i le tatou malologa. O le mea lea ou te tapa ma le faaaloalo lau Afioga i le sui usufono mo Salega Sasae mo le saunoaga i le tatou Tala Faatatau Faaopoopo (Nu.1) o le Tupe. Ia manuia le saunoaga.

Tofa OLO FITI AFOA VAAI (Salega Sasae): Faafetai. Ou te manatu ua maea palega auau le taliga o le sua i lau Afioga i le Fofoga Fetalai, tainane foi le paia ma le mamalu o le tatou Palemene nei. Faafetai atu. Faafetai atu foi i le tatou Matagaluega o le Fono Aoa Faitulafono mo la outou tautua o lo o faia pea mai lava i lenei 5 tausaga i le tatou Palemene.

Ia, ou te manatu o lea ua taoto i liu le atumua a le tautai matapalapala, se i tau faalalanu ai le agalelei ma le alofa o le tatou Matai Silisili Ese ma le tausiga foi i le tatou Palemene, ua taitai mai ai foi lou soifua ma so matou ola i lenei taeao matagofie, taeao filemu, taeao totoa ua tatou feiloai ai i magafetau o le soifua aua ua laolao le vasa i Asuisui i lona agalelei. Ona tatou faapea ane lea, le Atua e, e foi atu pea le viiga ia te Oe. E ui ina ua faia se tasi o poutu o le tatou Palemene nei, ae pule le Atua ma Lona finagalo.

E avea ai foi lenei avanoa e fai ai lou leo faatauvaa e fai ma fofoga o si ou itumalo o Salega Sasae e avatu ai le faamaisega ona o le valaau paia a le Atua i le uso a sui usufono, e le gata foi i le sui usufono nei, ae faapena foi se tasi o tama na mua i malae ae ou te le i tulai mai sa avea foi ma tautua i le tatou atunuu e ala i le tofi sui usufono. Ia, ia i ai pea le faamafanafanaga a le Atua i faletua ma nofoaalo ma aiga na lua faapea foi le mamalu o

itumalo. O le upu moni lava lau Afioga i le Fofoga Fetalai, ua tau sola foi manatu, ona o le faamalumu mai o le ao pogisa i luga o le tatou Palemene i le valaau paia a le Atua, ae talitonu lava o le Atua e le tuulafoai ia i tatou. Ona faapea lea o se matou manatu, o le a taumafai atu se matou tala e puupuu, leaga o le taimi lenei o le faafetai.

Ae ou te muai faatalofa atu i le tapuaiga a si o tatou atunuu, le paia ma le mamalu sausaugata o Samoa i ona itu taulagi, ou itu mauululuga, o outou paia ma mamalu masani faaleatunuu, faalemalo ma faale-Ekalesia, o le a le oo i ai se tala a Salega, aua o paia lava ma mamalu ua maea tofi tofa, e tumau lava e faavavau. Ia faamalo i le tatou atunuu le folau, faafetai foi i la outou tapuaiga, aemaise foi o a outou talosaga ua ae manuia ai le faatamasoaliiga a lou Palemene i lenei foi Paeaiga.

E faatalofa faapitoa i le paia i Ekalesia e fia o si o tatou atunuu i totonu o si o tatou atunuu i le tulaga ma la outou osigataulaga i lea aso ma lea aso ia to ni manu mo si o tatou atunuu. Faafetai tele.

E faapena foi ona ou faatalofa atu i le Afioga i le Faamasino Sili ma le Vasega o Faamasinoga i la outou foi pitolaau aua le sailiga o le amiotonu ma le taumafai foi e tau fuafua ma tatai o tatou tagata i ala uma faaetulafono.

E faatalofa atu i lau Afioga i le Fofoga Fetalai faapea foi le Afioga i le Sui Fofoga Fetalai, lau Afioga i le Failautusi, Sui Failautusi ae tainane le maave eseese o le tatou Matagaluega o le Ofisa o le Fono Aoaofaitulafono.

Toleafoa, ou te tapa fua i lou suafa ou te talitonu ua silinaa le aliiseu o seuga ma e le tau faitauina le fuifui i le putu pe taufaafulu le pa osofia a ua iloga lau tautua i totonu o le tatou atunuu e ala i le Nofoa lea. Faamalo faafetai. Faamalo foi le faapalepale i le tausiga o le fonu mamalu a le tatou atunuu, faamalo foi onosai. Ia alofagia e le Atua faafualoa pea lou soifua. O le upu moni lava lau Afioga, o lo o i ai mealofoa a le Atua i lau Afioga i le itu faaleagaga. E le o toe po se lilo o lo o i ai foi o tatou uso ua malolo foi manumalo, ae manaia foi lou agai atu faatu sau Ekalesia ona agai atu lea o le Tofa a Faasoo, le Afioga ia Tuitama, le afioga ia Aeau, ia o au tiakono uma ia, ona e lauga lava lea pei o la e te faifeau, ae toaaga le aualii ia e avatu au peleti ma au alofa ona leai lava lea ma se eseese, e manaia foi lena itu e faatino ai lau tautua. Ia, ou te talitonu foi lau Afioga e le galo i lau Afioga foi lou nei tagata faatauva. O le tele foi lava o taimi e te ote ma lou saunoa mai ou te faafiufiu ma tulaga uma, ia, malu ave i fale i lou finagalo se aga ma se amio. Ia, o a foi ni a tatou feeseeseaiga i ni manatu ma lagona, ia tatou lafo i nuu le aina, ma tatou manatua ai le faamagaloga foi lea a Iesu na fai i luga o le satauro i si pagota foi lea o le a uma lava lona soifua ae toe alaga atu ia Iesu, alofa mai ua ou salamo. A e afio i lou Malo, ia e manatua mai au. Ona tali loa lea o Iesu, “Ua lelei, ou te faamagaloga ia te oe, o le aso foi o le a ta feiloai ai i le parataiso o lou tama, ae malie, tautau mai pea i lau satauro se i tali ma fai lau sala.

Ia, ona ou oo mai lea ou te faatalofa atu i lau Afioga i le Taitai o le Atunuu, lau Afioga i le Palemia, si au uo faapelepele, le paia o le Kapeneta, le mamalu i Ofisa Sili o Pulega o Matagaluega ma Faalapotopotoga a le tatou Malo, ae tainane foi le lavalao o tupu ma ee, o alo foi ma fanau o lo o faia le tautua e ala i le tatou faigamalo. Faamalo faafetai, malo le faatoatoa malo galulue, e taumulimuli lava faamanuiaga i le tagata e auauna ma le faamaoni. Lau Afioga i le Palemia, ia, e faamalulu atu foi pe a i ai foi se taimi ua siisii o matou sa, a o le agaga lava o le naunau, fautua, timai ma fesoasoani atu i la outou galuega, aua matou te talitonu e le o se galuega e faigofie. O tatou foi o le faigamalo e avatu aumai, ae matua lava i le oo ma saili se lelei o le tatou atunuu.

Ia, avea foi lenei laolao matagofie ou te faatalofa atu ai i si ou itumalo o Salega Sasae, le paia lava lea aua le afio o le Afioga i le Tuiaana Tuiatua, le paia i Aiga na mua i malae o Samoa. Le afio o le Matua, Maopu ma le Alaalamaota, tausivaatele e le mamalu ia Sautuvai, Sautugia, Taupoloalii faapea foi le mamalu i le Alataua. O lau tapuaiga ma le tui mai o le mulipapaga i Salega Sasae, ia atoa ai foi ma Salega Sisifo ma Salega atoa leaga e aiga lo matou itumalo. E momoli atu le agaga faafetai tele i se tautua le tau ma faatauvaa o Olo nei, faamalulu atu, ona ua pau lava o se mea ou te mafaia e faatauvaa le auauna. Sa i ai lava le manatu e tatou te feiloai pe a faataape le tatou Palemene, paga lea, e talitonu e le toe ganea i sou vaivaiga ona ua muamua ta le aufai ae faanoi mulimuli atu. Aisea? Ona o Tulafono a le au ula lea. Ia, e i ai se taimi ona tatou feiloai lea, se taimi o i luma.

Faafetai atu foi i ou aiga iinei i Samoa ma atunuu i fafo ma e uma lava o le tatou atunuu o lo o latou lagolagoina sou taumafai ma sou vaivai i le faatinoga o lau galuega i totonu o le tatou Palemene.

Ia, lau Afioga i le Fofoga Fetalai, pei lava ona ou fai atu o le taeao lenei o le taeao o le faafetai, o lea ua fulufulu a tatou meafaigaluega aua ua uma, ua ae faiva, e le toe i ai se mea e tataua ona toe gase. I le tatou faiga palota, ia, e i ai lava le agaga maualalo, faimalu o tatou faiva, tatou te taaalo lava o tatou o le aiga, aua na outou pauu uma atu lava i le toala faaautama o Moeleoi tulou le faafogafoga a le atunuu. O le mea foi la lena ua ou talanoa atu ai faamatua atu i le taeao lenei.

Ia, ona ou oo mai lea i le Tala o le Tupe, ua ou nofo lava ma ou matamata atu ma ou vaavaai atu i le Aiga Kapeneta, ua le toe i ai ma se isi e tusitusi se mea pe a fai atu matou lauga ai ona o le taimi faaiu lea, oi lea la faatoa tusitusi mai Loau. Ia, ae na ou manatu lea, o le a le avatua ni manaoga po o ni tulaga faapena, ae tau ina ou faamalulu atu i a outou Afioga, o le tele foi o taimi e tatou te one two ai i le tele o taimi, ia o aga lava o le tatou taumafai e saili ni manu se tele aua si o tatou atunuu e ala i le faasoaina o tatou lagona ma manatu.

Lau Afioga i le Fofoga Fetalai, pei ona ou fai atu e le umi se lauga a Salega, na o ni nai mea lava ia e tau ina ou faamanatu atu, i lau tilotilo ma lau vaavaai

mai lava i le amataga o lenei Paeaiga, e i ai lava ni vaega o a tatou Tulafono e le mafai ona tea ese ma au, e ao lava ona faaali atu se manatu.

Lau Afioga i le Palemia, na o se tuualalo lava ma faataatia atu i tafatafa se talosaga a lenei itumalo, i le mea lava lea na taoto ai le tatou Tulafono ua uma ona pasia i le sainia lea e lau Ofisa Sili o Pulega o le Matagaluega o le Palemia le faamaoniaina o so o se Tulafono a le Palemene pe a atoa le 7 aso e le i sainia e Le Ao o le Malo. Na o se tuualalo lava ia te au ia ma lou lava lagona, e le o talafeagai, ae tau ina toe silasila ifo i ai pe sao se lagona. A le sao, ia toe faau mai i tua se manatu o Salega, e mafua ona o Tulafono e tau faaofi mai e le Malo, pasia atu e le Palemene ae a toe avatu la e faamaonia e le Ofisa Sili o Pulega o le Matagaluega a le Afioga i le Palemia, ona i ai lea o se fesili tele i le vaega lena ma le vala lea.

O le isi itu lau Afioga i le Fofoga Fetalai, e fautua atu i lau Afioga i le Minisita mo Faiga Palota, se i e silasila ane i se vaega o le Tulafono e matua loka ai le faaaogaina e so o se faigamalo o ni atinae ma o latou tiute o lo o tofia e faatino mo le atunuu e faia ai faatosina i totonu o mea nei o faiga palota. Ou te talitonu e le o i ai se vaega lena. Ae ao ona e silasila lau Afioga i lena vaega ina ia sosolo lelei a tatou faiga polokiki, e le gata i le aso, ae faapena foi i le lumanai, aua e uma tatou o. Tatou sikaili i le sikaili a tama matapipii, tatou te toto le faatoaga i le taimi lenei, e le mo tatou, ae mo alo ma fanau a le atunuu e fai mai. Ou te talitonu, e pei lava ona ou fai atu lau Afioga, e le o se lauga umi le lauga a Salega i lenei vaitaimi, leaga o lea foi e faasolo le aoga manogi a le Vaega Faaupufai foi lea a le FAST lea ou te i ai, ma ou toe lauga ai loa i lou itumalo ma tulaga faapena.

Ae mo le taimi nei, faamanuia le Atua i lau Afioga, faamanuia foi le Atua i le Afioga i le Palemia ma le Aiga Kapeneta, o sui usufono mamalu. Ia, aua tatou te faimeaita i nei mea o palota. Le sui o Faleula aua le tagi. A i ai se mea ma metotia faaneionapo ma metotia i tua atu tou te fia silafia ou te manumalo ai, ia o la e afio mai le afioga i le Master i le faiga o le mea, fesili i le Afioga i le Fofoga Fetalai, aua ua tele foi mea ua ou maua mai lana Afioga i le mea lea. E sa le tagi, sa le tootuli. Faafetai i lau Afioga mo le avanoa. Manuia le Fonousu a Samoa, faamanuia le atunuu.

Na faaalialia le agaga fiafia o le Palemene i le patipati o latou aao i le maea ai o le saunoaga a le sui usufono mo Salega Sasae.

FOFOGA FETALAI: Malo. Ia se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e faamalo i le sui usufono. O se mea e fia faasao ae sa ou le manatu e tulai atu e faalavelave o sausaunoa le sui usufono, ma e tatau lava ona ou faasaoina le mea lea, leaga ou te manatu e aafia ai le Faavae o le Malo o

Samoa. E le i faia e tatou, tatou te le i fausiaina le Faavae, na fausia e le 160+ taitai o tupu ma ee mai o tatou itumalo ma le toafa o Tama a Aiga sa i ai. O le tasi o Tama a Aiga o le Afioga ia Fiamē, ina ua faatalanoa le mataupu o le agavaa e saili ai se Ao o le Malo, na toesea ma faalaolao nofoa o Tama a Aiga e toatolu, ae saofai ai pea Fiamē. Ina ua saunua Fiamē, o le ala lea na ou ulufale mai ai i le Palemene i le Suafa Fiamē, ou te le i sau i le Suafa o le Mataafa, ona o le Mataafa o le Tama a Aiga, ae na ou sau i totonu i le Suafa Fiamē, e le o se Suafa tau Tama a Aiga, ou te tautua o au o le auauna a Samoa. O le ala lea na ala ai ona saofai i totonu i le filifiliga o le agavaa o se tasi i le lumanai e avea ma Ao o le Malo, na latou faataatia mai ai lea o le agavaa e filifili ai se tasi e avea ma Ao o le Malo, o le agavaa lava e tasi e filifilia ai le tagata e avea ma sui o le Palemene leni o Samoa o le suafa matai, ua aloaia ma ua resitala.

Lau Afioga i le Fofoga Fetalai, ina ua oo mai le faatalanoaga i le Tulafono e pasia e le Palemene leni o le Supreme Body lea, le Fono Aoao Faitulafono, o lea e i ai uma sui o le atunuu leni o Samoa, ae pasia se Tulafono ae avatu se Tulafono teena e le Ao o le Malo e toatasi, na umi o felafolafoai sui o tatou itumalo ma taunuu ai i le faaiuga lea, pe afai e avatu se mataupu ae le sainia e Le Ao o le Malo, ona tuuavana lea i ai i totonu o le 7 aso. O le 7 aso lena e mafai ai ona toe silasila i ai le Kapeneta po o se mea e tatau ona toe taofia ai se Tulafono pe leai. Ma o se avanoa foi lena e toe fetuunai ai le finagalo o Le Ao o le Malo i sana faaiuga ua na le taliaina ai le sainia, e 7 aso. A uma le 7 aso e le i sainia e Le Ao o le Malo, ona faapena loa lea ona fai, faataoto mai le auala, valaau ai samania loa le Failautusi o le Kapeneta e faalauiloa i le atunuu, ua aloaia le Tulafono. O lona uiga, i lalo o le faaupuga e faa-Peretania, 'The Law is deemed to come into effect'. Ua i ai le finagalo o le tatou Ao o Le Malo, e ui e na te le i sainia.

Lau Afioga i le Fofoga Fetalai, o le Faavae faataatia mai e o tatou matua. E le o se mea fou. O lea la ou te faasao atu ai lau faaaliga lea e le sao.

O le vaega 2 lea sa e aumaia, o galuega e tatau ona taofi e le Malo, ona o le faatosina. O a la galuega ia? O lona uiga e aua ne i toe faia ni atinae? E le mafai ona nofonofo le Malo lau Afioga. Ua uma ona ou faasilasilaina atu, e oo loa i le taimi e faataoto ai ia le anavatau a le Vaega leni, ma filifiliina e faiga palota, e oo loa i le taimi e faaiu ai le faigamalo ma tofia mai, o faagasolo lava galuega e le mafai ona taofia. Aemaise o nisi o galuega nei, o lea e faatupe mai i fafo. O lona uiga o le taimi e taofia ai, soloia loa ma seleni na mai i fafo.

O le tulaga la e pei ona ou tau matau atu i le sui usufono, taofi galuega ae faapefea le atunuu la e faatali mai? Ia o latou vai ia o latou paipa ma tulaga faapena ma le falemai? O lona uiga e taofi atinae ia se i uma le faiga palota ae faapefea pe a feoti tagata?

Lau Afioga i le Fofoga Fetalai, e le mafai faatino. O au fautuaga ia na aumai e le fetau lau Afioga ma e sese. Lau Afioga i le Fofoga Fetalai, o le faasaoga

lena. E malamalama lelei le Maota ma le atunuu o lo o faafogafoga mai. E le faapea o le a avea ia le tatou faiga palota ma taofi ai, mea o la e moomia e le atunuu e tatau ona faatino. E le mafai ona e faapea atu, faatali la se i uma le faiga palota ona faatoa togafiti lea o oe. Leaga a togafiti ona tuuaia lea faapea o le faiga faatosina.

Lau Afioga i le Fofoga Fetalai, o le mea lea e faaaoga i ai le tofamamao, le tofamamao na aumai e le Atua ia tatou faaaoga tatau ina. O le tele o tagata e tasi lava si mea lea e misu, common sense. O le faamasinoga tatau o le amiotonu.

Lau Afioga i le Fofoga Fetalai o le a tauau ina seetia tele tatou i mo mea o manatu ia mai fafo. Manatu e aua ne i faia le mea lea, aua le faia le mea lea te i ua faitiona tatou. Fefe, o upu a le isi Peresetene, o le gasegase lea o lea e gasegase ai tatou o le fefevale gofie, ona tuu ai lea o Afioga a le Alii, 'O le mea e te iloa, e tatau ona fai, fai loa'. Aua o le le faia, o le agasala lena i luma o le Atua.

Lau Afioga i le Fofoga Fetalai, o le faasaoga lena.

FOFOGA FETALAI: Malo fetalai... ia...

Tofa OLO FITI AFOA VAAI: Lau Afioga i le Fofoga Fetalai..ia, ou te faafetai atu i le Afioga i le Palemia, ona o lea foi ua faapea mai e sese, ia ae sa avatu lava ia nai ou lagona. O le mea lea o le Faavae o lo o saunoa ai le Afioga i le Palemia faapea o mea ia, leai o le Tulafono lea na ou faapea atu, o le tofiaina i le suiga o le Faavae i le saina lea e le Ofisa Sili o Pulega, faatoa fai ananafi. Po o le 2016, o le tulaga la lea o le faatosina...

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, o le mea e fia faasao...

Tofa OLO FITI AFOA VAAI: A lea na saunoa sao lava ia le Afioga i le Palemia....

FOFOGA FETALAI: Se i onosai mai

Tofa OLO FITI AFOA VAAI: 'Samoa o a matou faatosina na'.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: O le mea e fia faasao...

Tofa OLO FITI AFOA VAAI: E ese galuega Vaega Faaupufai, ese galuega faale-Malo.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O le mea e fia faasao...

FOFOGA FETALAI: Malie le sui usufono o Salega se i faamalamalama le itu lea e te fia malamalama ai.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: O lea sa ou talanoa atu, se o le mea lea e tupu ai le faaletonu. Se o le lē o e faitau ia felafolafoaiga o le Fono Faavae, lea na sese uma ai lava ia latou nei, sese uma atu ai ma loia, sese uma atu ai ma nisi o faamasino. O le le faitau, i poloaiga na aumai i o tatou matua. O lea e i totonu uma lava, o felafolafoaiga o le Fono Faavae. E le i faia ananafi le mea lena.

Lau Afioga i le Fofoga Fetalai, o le ala lena na ou tau matilatila atu ai, le sese, ona e le faitau le sui usufono lea i le tatou Tulafono ma malamalama ai. Pe taumafai foi e malamalama ai.

FOFOGA FETALAI: Ia, ma e faapea la se fautuaga a le Nofoa, ia e le teena e le Nofoa le tulai mai o le sui usufono o Salega Sasae, e saunoa ma pai i le itu lea. Ae malo foi manaia le saunoaga e le o faalavelave foi le Malo. Masalo o lea na matau mai e le gata i le faafofoga mai a le Palemene ae o le matau mai a le atunuu.

O lea ua tuuafu le saunoaga maea ona faatoa tu mai lea o le Malo e faamalamalama ia ma faasao ia mea na laga e le sui usufono. E ui lava e itiiti mea sa laga, ae ogaoga i le tulaga o le matau a le Malo, leaga e ao ona faasao leaga e itiiti lava, ae faapaia mata le tulaga o le mataupu. O le uiga o lea mea, ona e tataiese ai ia lagona o le atunuu, ia ma le talitonuga foi lea faapea, o lea ua sui, ua i ai se suiga e le Malo o le tulaga o le faatinoina o le Tulafono ma tiute.

Ia i lou lava talitonuga, na ou sau i le Palemene i le 1991, o le tulaga lava lea sa i ai ia Faiga Faavae a le Malo. E faagasolo lava galuega ma faapena na afifio le Malo e tatala lea tulaga ma tatala lea atinae ma faatino lea atinae e le mafai ona taofia, aua e fua i le taimi e pei lava foi ona saunoa ma faamalamalama e le Palemia. E le gata i atinae e faatino i le tatou lava tamaoiga ao atinae foi e agalelei mai ai ia le Faletupe o le Lalolagi ia ma nisi o a tatou paaga mai i fafo ia e faapena. E tatau ona o latou iloa, o le mea lea ua tatala ua maea ona tatala e faapena. Ia e le mafai la ona suiina e se lagona se toatasi.

Ia e pei e faapena le lagona, e le o se mea ananafi po o se mea o le Paeaiga lenei. Po o se mea tala atu, leai o le mea na afuafua mai ai ina ua tulai mai ia le Faigamalo o le HRPP, ia e faapena. Samoa tatou ositaulaga, atinae le atunuu. Ia ae a maea la ona faatino se galuega, ia e faapena ona faailoa. E le gata i le itumalo, ia ae faapea foi le atunuu ua maea le atinae i fea ma fea.

O le suiga o le tulaga lea o le Faavae, ia e faapena foi o la ta lea faitau, aua maimau e pe ana e seei i le Nofoa lea aua e tasi lenei Nofoa e ao ona tilotilo foi le Fofoga Fetalai latou ia faitau ia maea ia le tulaga o felaugaina ma le agaga sa i ai i latou o Taitai o le atunuu i le taimi sa talanoaina ai ia le Faavae o Samoa ma le taumafaiga o le Tutoatasi. Ia e faapena ou te molimau atu o le tulaga lena sa i ai. Ma e o le tulaga foi lena o lo o i ai.

O le mea la lea, ou te faamalulu atu i le sui usufono, ia e faigata ona toe tuu atu se avanoa foi lea faapea e toe aumai ai se isi ou finagalo. O le tali a le Malo, o le tali e faamalamalama ma faamuta ai se mea. Se i outou omai foi outou, sala le gagana ae o le upu e foi mai i le Fofoga Fetalai, ia tatou faamoemoe i le finagalo o le Atua aua le alofaiva, ioe, le alofaiva o le atunuu i lana faiga palota. Alu alu ua manuia lena itu, ona outou omai lea se i outou silasila foi outou i ai, i le moni ma le faamaoni o le tulaga o mea ia matou te taumafai, lea e saunoa atu ai le Palemia. Ae ua mafua ona ou taua le tulaga lea, leaga o lea ou te malamalama i ai foi au ia.

O le mea la lea ou te faamalulu atu ai i lau Afioga i le sui usufono mamalu, ae o le saunoaga, malo faafetai. E fia logo e pei o le upu e fai i le mauga o Matautia e tausi vaatele e le Alataua. O le mea la lea, o le a faamuta ai i i le tulaga lea o lea ua manino auofala. Ae faapea se lagona, ia ua avanoa foi mo se isi saunoaga e faagasolo ai ia le tatou galuega.

O le taimi lenei o le manaia ia i le lauga aua foi o la ua manava, ua malolo galuega o la ua tau fai ki uma mai ia leitio ma laau a le atunuu i le tatou Fonotaga, aua e latou te fia iloa foi e matau mai i saunoaga i sui usufono mamalu e fili ai i ina latou taitai. Ioe, aua o le isi filiga o taitai, e fili atu lava i ana taga i totonu o le Maota lenei. Ia e pei e faapena se lagona. E tasi lena mea na le tu mai ai le isi tamaloa i le sui usufono, na talosaga i lona itumalo e toe tuu atu se avanoa leaga o ia faatoa masani o lea sa tau faamasani.

Tofa OLO FITI AFOA VAAI: Ia o le mea lena na ou toe tulai atu ai lau Afioga.

FOFOGA FETALAI: Ae fai mai le isi toeaina, o le mea lenei o le sui usufono e le tau faamasani. E oso i totonu ua masani, so o se taimi lava la ua masani.

Tofa OLO FITI AFOA VAAI: E pei o le ala lea lau Afioga i le Fofoga Fetalai, ua ou tulai atu pe le toe maua se isi ou avanoa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, e le afaina o lea faatoa amata ia le tatou Fono. Ma e o lea lava ua faigata ona sosoo ia lauga, leaga o le saunoaga i le taeao lenei, o saunoaga o le vateatea. E pei lava la e tau matau atu o au o le Taitai o le Maota lenei, e

i ai foi le agaga maualuga ia te au, e fia tuutuu atu ia ou tauau, aua e leiloa pe te i ua fonu po tatou e oo lava i le ao, ia so o totoe, ae o lau toe vaai foi o lea ua ta le 12 o taimi o taumafa. Ae o le tofa lena e i ina i lau Afioga, ona ou te lagona e moomia lava e le Maota lena le fai fai easy, fai fai easy foi lea e fai fai malie. E leaga o le toe fonu lena o lo o fia faafogafoga mai foi ia le itumalo. Ia ae faapena foi ia le tatou galuega e faasolosologasue.

Ae o fea o i ai le tofa i lau Afioga? O lea foi ua ta le taimi, o le mea e tatau ona fai ma fuafua i le malosi. E leaga ou te talavou atu i le vaega uma lea i totonu o le Maota.

Tofa OLO FITI AFOA VAAI: Lau Afioga, ia ua faalua le lafo. E manaia foi lena e tosotoso ai pea si a tatou amio.

Tofa LEALAILEPULE RIMONI AIAFI: Ia o le agaga foi lena lau Afioga Tama. Manaia le taitoalua i le aso.

FOFOGA FETALAI: Ia o lea ua tulai mai ia Leala e saunoa. Oi, ioe, ua tele le fia tuu atu le avanoa e alu ia lau faalua Olo, ia e pei e le lelei o le a e faalua ae faatasi ae o lea lava e leai se isi. Ia ae o lea e tausaili ni avanoa o isi. Ia aua e pei e faapena e tasi lena upu e fai mo le tamaloa foi lea e alu le faalua ae tasi le toalua. E pei e faalelelei foi lea, se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Ae a pe a alu ia le faatolu e faatolu ai foi lea i so o se mea.

FOFOGA FETALAI: O le tulaga lea e i ai Olo ua fai le toalua ua pule lava ia. Ia malie o upu e...

Tofa OLO FITI AFOA VAAI: Ia tasi ae foi atu le saunoaga a lau Afioga. Se o mea na omai ai foi ouluga o toeaiaina.

FOFOGA FETALAI: Ia malo faafetai. Ia, ona o le faaaogaina o tatou taimi aua e leaga o lea e faamaumau e le Failautusi o tatou taimi.

Afioga Hon Loau Sola Keneti Sio: Lau Afioga i le Fofoga Fetalai, ia ua ou tulai atu ma le ava tele, leaga o lea sa taua e le sui usufono lou igoa i le taimi lea sa fai ai lana lauga. Ia atonu la o lea ua maua si laolao lea na ou tusitusiina. Leaga e sao le sui usufono sa faapena ona ou faamaumauina. O le taua ia te au, leaga o au o le Minisita o Aoga. O la e faalogologo mai tamaiti i lauga sese, ia ma lauga sao. O lea la ua fetuunai nei ia muniao, aua e aoga e fai ai ia fesili.

Ou te iloa foi e i ai fesili foi ia e masani ona fai, ona tali ai lea true po o le false. O la la e faalogo mai tamaiti po o anafea na afuafua ai le Faavae? Ae o ai foi na faia? O lea la ua maua ifo, e false ia le lauga a le sui usufono. O le taua la lenei o lau faamaumauga, ia mo le Matagaluega o Aoga.

Tofa OLO FITI AFOA VAAI: Lau Afioga i le Fofoga Fetalai, e sao ia le saunoaga a le Minisita. Manatua foi ia tatou suega e i ai le vaega lenei o multiple choice e i ai le mea faapena. E pau lava lenei o le mea na pasi a Loau, aua foi e matemate.

FOFOGA FETALAI: Ia malo, ia ua o matou leiloa po o ai o ouluga e pepelo. Ia manaia le tulai mai loa se sui usufono leaga e... a tatou manava nei i le taimi lenei, e le faitauina le tatou aso atoa. E tou te le o silafia le mea lea ou te loto i ai. Ia na ona tu mai lava se i faamatogi ia, ia tatou faapena loa, ia aso atoa loa.

Ia, o lea la ua tu mai le Afioga i le Sao, le Afioga ia Toomata. Itumalo o Salega Sisifo. Ia saunoa ia lau Afioga i le Sao Toomata.

Afioga TOOMATA AKI TUIPEA (Salega Sisifo): Faafetai mo le avanoa i lau Afioga i le Fofoga Fetalai. Sa ou faatalitali lava faapea, leaga o le matou lipoti lea i le Laulau a Fono. Ae faafetai mo le avanoa ua maua.

E muamua ona ou faatalofa atu i lau Afioga, Fofoga o le Palemene o Samoa. Faafetai i lou faatautaiga o le tatou Fonotaga, mai lava i le taimi na matou ulufale mai ai, o lea ua oo i le faaiuga o le Paeaiga, matou matauina lava le toa o lau tofa. Matou matauina foi lau faautautaga faatoeaina ma silasila i le Atua, aua lava le Palemene o Samoa ina ia toa, aua ne i vevesi. E ui lava na i ai luitau na tulai mai, ae faafetai o lo o e lava papale lava, ma tuu avanoa i sui usufono mamalu o le Maota.

Ia o paia ma mamalu masani sauoo o Samoa, o le a nuunuu atu ia faatini o tausala. Aua o paia lava e tumau, e le suia pe faaopoopo se iota, i se faamatalaga a le sui usufono o Salega. Ae ua ou tulai atu, aua lava se sao o lenei itumalo o Salega Nu.1 i le Tala Faatatau o le (Nu.2) 2020/2021. E avatu ai sau faafetai i le Taitai o le Malo, lau Afioga i le Palemia aemaise ia le aiga Kapeneta aemaise foi Minisita Lagolago.

Faafetai foi i Faauluuluga o Matagaluega, ona o le tapenaina o lenei Tala Faatatau Faaopoopo o le Tupe. I le matau a lou sui usufono, o le tele o vaegatupe o lea ua faasaoina, ona ua leai ni femalagaiga. E le gata foi i lea, e leai ni tupe faaopoopo tele o i ai, o lea ua ave ia le faamuamua, ina ia mafai ona faaauau nisi o atinae e tatau ona faamuamua, aua le sologa lelei o le auaunaga, mo Samoa ma ona tagata. Faafetai le faatoatoa, tele luitau o lo o feagai ma le Malo. E tele foi nisi o faamatalaga ma faasalalauga, e ono saveu ai le filemu ae peitai, o lo o toa pea le tai. O lo o silasila pea i le Atua, e faapena ona maua ai le filemu o si o tatou atunuu. I lau vaavaai i le tatou

Tala i le Tupe, e leai se suiga o le tupe pau po o le deficit o lo o i ai i le Tala Faatatau Autu o le Tupe. E ui ina i ai le faaopoopoga lenei, o lo o tumau lava e pei ona i ai i le amataga.

O le mea lea e avatu ai le faafetai ona o lenei faasoa, o nei vaegatupe o lo o tatou taumafai ina ia faaauau galuega. Faafetai foi ona o le tele o tupe o lo o maua mai faameaalofa, fesoasoani i le atinaeina o le tatou atunuu. O ia vaegatupe faameaalofa, e le mafua ona maua mai ona o ni meaalofa e tuufua mai i lea tausaga i lea tausaga. E ala ona mafai ona tuuina mai ma lima mafola mai faalapotopotoga ma Malo mai fafo, ona o le lava o le latou talitonuga, o le taitaiga o le Malo.

O le mea lea e momoli atu ai le faafetai tele, ona o le lima mafola o paaga mai fafo, mafai ai ona soosoo tauau, tupe o maua i totonu o le tatou atunuu, fai ai le faasoa aua lava le auaunaga mo o tatou tagata. E faafetai tele i le tele o galuega faatino o lenei tausaga, o lea foi e faamanuiaina ai ia lo matou itumalo. O nisi o galuega, o le fausiaina o auala galue, faafetai tele. E le gata foi i lea, faafetai ona ua i ai se tanevai tele i totonu o le matou nuu o Samata i uta. O lo o teu ai le vai e faasoa atu i le itumalo. O lea foi ua maua le fesoasoani mai i le Malo o Iapani, aua le toe faafouina o lenei faleaoga Tulagalua o Fagafau ma Samata i tai, ona o le faatofalaiga ma le faigapaaga ma le Malo o Samoa, ma le Malo o Iapani.

Ou te talitonu, ana le seanoa le talitonuga a Iapani i le Faigamalo, e le mafai ona maua mai pea ia nei fesoasoani. Ua fia tausaga, fia tausaga o sau pea. Ua le gata i faleaoga, ae o le tele o poloketi tetele o lo o mafai ona faatino i lo tatou atunuu ona o ia lava fesoasoani o lo o tuuina mai e nei Malo tetele. Faafetai, faafetai tele.

Faafetai foi, i lau Afioga i le Taitai o le Malo ma le Kapeneta, e auala atu i le Minisita o Aoga, ona o le fesoasoani maua atu mo le faaleleia o le malaetaalo o le matou Aoga Tulagalua i Samata i tai ma Fagafau. Sa tuu e faapaia le matou faleaoga i le faaiuga o lena tausaga, ae peitai e fetai le taunuu atu o le fesoasoani lea \$50,000 faafetai o lea ua.... masalo a outou silasila i ai, e le \$50,000 le mea lea ua faatino. Masalo e \$150,000 ae faafetai o le mea sili ua maua mai lena fesoasoani.

Aua o le matou aoga, sa leai se malae. E pei lava ona outou silafia ia le vaega lea o Savaii, ia e tifato i lalo, e mauga i luga. E tele tupe e manaomia ai e le gata i le faaleleia o mea e tutu ai faleaoga ae o fale foi o tagata ona e tulaga ese lava ia lo matou itumalo, e mauga i luga toe mato i lalo. Ia ae pau lava, faafetai foi i le Atua ua mato lo matou nuu matou le popole foi i le tsunami. E matou te le o tagi foi i ni taligalu e pei o isi itumalo. Atonu lava e aoga foi.

E faafetai foi i le tele o mea lelei ua fai e lo tatou Malo mo lo tatou atunuu. E le gata i le atinae o lo matou lava itumalo, ao lo o faasolosolo auala ma faaleleia auala aua femalagaiga a lo tatou atunuu. O lea ua taatia mai i le Tala o le Tupe, fuafuaga mo le faaleleia o le tatou auala lea e tau i o i le

malaevaalele. Ia e le taugofie ia mea. E le faigofie foi ona faamatuu mai ia nei vaegatupe mai faletupe ma atunuu o lo o mafai ona maua mai ai ni fesoasoani. Ae ua ala lava ona maua nei fesoasoani, ona o le talitonuga i le faafoeina o le tatou Faigamalo lenei, Paeaiga ua 5 tausaga.

O lea matou te faafetai ai e fai ai lou leo e fai ma sui o le matou itumalo, Salega Nu.1 e faaleo atu ai se lagona fiafia ma le faafetai tele i lau Afioga ma le Kapeneta, ia ma le mamalu o le Faigamalo.

Ou te avea foi lenei avanoa, e momoli ai lau faafetai i lou itumalo pele, Salega Nu.1 mai Fagafau, o le Paia lava lea i Alo o Lilomaiava, lau Afioga Seve ma Tilimafaga, Afioga Tuimaugapo ma le aiga Sa Tuimaugapo, ae polapupui e Sa Soa ma Samai.

Faiaai, lau Afioga Fualau ma lo outou aiga, afio lau Afioga Tuilafono ma Faavaoga. Afifio Sua, o Gisa ma le Aloalii ia Fepuleai, lau Fetalaiga Tuisalega, e te teu vaatele i lo tatou itumalo.

Fogatuli, lau Afioga Afualo ma le Toafa ou Alo, lau Fetalaiga Faimanu, o le fofoga o Usoalii.

Ona faaiu ai lea o sau faamatalaga, i lou itumalo, i si ou nuu pele o Samata i tai ma Samata i uta. Afio lau Afioga i le Sao Toomata, le Toafa o Alii, Mase ma Togagae, Soi ma Alo. O le matua o Tuipea ma lau Faleono, faapea le paia ia Saleutogi na lima matua i faleupolu o tofiga le toatolu o alii, Samata i uta, lau Afioga Faasavalu, Afio lau Afioga Pupuva, lau Afioga i le Togagae. O le matua o Selu, ma lau Faleono, lau fetalaiga Tagotau o le pitofanua. Lau fetalaiga Fau o le tagata o le vavau ma le paia ia Saleutogipoe.

Faafetai mo le tou faaaloalo. Faafetai i le tou fai tapaa. Ua mafai ai ona ou tautala i luma o le Fonousu a Samoa i lenei 5 tausaga. Faafetai i le tou faitatalo, faafetai i le tou tapuaiga. O le a se mea ua mafai e le sui usufono na outou tusifilima i ai i le 5 tausaga lenei, pau o le mea ua mafai. E fai aso pea le alii.

Ae faamuliga sau faamatalaga, sau faafetai i feao o le Talalelei, aiga o Sa Levi. O so o se fata faitaulaga e fia i totonu o le itumalo, o outou faletua ma nofoaalo. Ua outou aumau i nuu ese, tuua lava outou aiga e toatele, ona o le tou manatu i le Atua ma lana Talalelei. Faafetai le faitatalo, faafetai le tapuai, faafetai i la outou faatofalaiga, o lo o malu ai le itumalo. E leai ni vevesi, maua le fealofani o nuu, o aiga, le pule mamalu a Alii ma Faipule, faletua ma tausi, saoa ma aumaga seia oo atu lava i le fanau. Nuu o le tatou itumalo, faafetai tele i lo outou tautua Malo. Faafetai i lo outou talia lelei, soo se polokalame a le Malo faasavali atu e Matagaluega taitasi. E le gata i le Ofisa o Aoga, Ofisa o Tina ma Tamaitai, o le Ofisa o le Falemai, o le Ofisa o le Vai, ma tulaga uma faapena, tele lo outou faaaloalo ma le tou talia ma le fiafia. O a lava polokalame o lo o tuuina atu, e le o teena, aua o le lumanai lea o le tatou atunuu. O a lava polokalame ua saunia e le Malo e auala atu i Matagaluega taitasi, e le faia mo se lelei o le Malo, e fai mo le lelei o le atunuu, tagata taitoatasi. E oo foi i le taumafaiga o aoaoga o fai nei, e le

faigofie, e le faigofie. Ae faafetai i lou itumalo, i lo outou tautua Malo, saili Malo, ua mafua ai, ma lo outou talitonuga i le Malo, o i e maua ai le manuia, le HRPP. O lea e faafetai i la outou faatuatuaga o le faigamalo aemaise foi o lou nei tagata. O lo o i ai galuega tuua, o lo o taatia e le i faaaauaina, ae ona ua pau o le mafai ua oo i ai ma le malosi mai le Atua, ua mafai ai ona faatino ni galuega. E le tau laulauina atu o lena ua outou vaavaai ma silasila i ai, ae ou te faape atu, o ai lava o i matou o le a tausinio nei o le a toe tulai mai, faaaau ni galuega lelei mo le lelei lautele o le itumalo. Le Alii e le Atua e, faamagalalo mai se sese o lau auauna. Aua e poto lava le tautai ae sese lana atu i ama.

Lau Afioga i le Palemia ma le aiga Kapeneta, e i ai nai tulaga o mea o lo o fia talosagaina e lou itumalo. I le lata mai nei i le masina lenei sa ou alu atu ai i Savaii. Na poloka lau taavale i Fogatuli, ua tafe, e le i masani ona tafe, ae ua matua tafe lava le mea la e i ai le sima, ua le sao se taavale. Ua ou vaai ua tele le suiga o le tau ua i ai, ua ou talosaga atu ai, faamau ane, afai e le o le taimi lenei mo le lumanai. Lau Afioga i le Minisita o Galuega lau Afioga Papaliitele talosia ia e toe tulai mai, ma ou toe sau foi. Ona faaaau lea o le toe faaleleia o le tulaga lea. ua tataua ona sii i luga leaga ua tele le suiga o le tau ua afaina ai lea vaega o Fogatuli. E le gata foi i lea, o lea ou te manatua lata mai nei, sa avatu ai lau tusi i le Pulega o le Suavai, ona e i ai nai isi tagata o le afioaga lea o Fogatuli e nonofo latalata i le mea o lo o i ai le pamuvai. Ae o gauta atu la o le pamuvai pe toa-ono i latou, e talu lava ona fai le pamuvai, e le maua so latou vai, e le maua so latou vai. Ae sa ou fesilisili i le tamaitai pule o le Pulega o le Suavai, ae faapea mai, leaga e tu i gauta o le pamuvai, ae o le vai o lo o alu agai i lalo i le tele o le nuu. Ou te tatalo atu ma lou faaaloalo o tagata ola foi nai tagata ia, o lo o fia maua le suafa. Silasila ane, a i ai lava se auala e mafai ai ona toso le pamu i gauta, se isi pamu e pamu mai ai le vai i nai ia tagata, e talia ma le faaaloalo. E le tau faailoa atu le aoga o le suavai, o le suavai o le ola. A leai se suavai ua leai se aoga. O le mea la lea, e tatalo atu ai i lou ava ma le migoa. Lau Afioga i le Taitai o le Malo, auala atu i lau Afioga i le Minisita o Galuega, se i silasila ane i nai tagata nei, i faapea ai ua faailoga tagata le Malo, e i ai nai aiga na e fia maua se latou vai.

E faaiu atu ai sau faamatalaga i lou itumalo, malo lava le tapuai. E faamoemoe i le Atua le sailiga o le tofi o le itumalo o le isi 5 tausaga. O ai foi i latou o le a matou mili faatasi i le faigapalota. Ia faifaimalie, faitotoa le faiva, se isi i sela e le i taitai. O lea lava tou te vaai mai ou te alu atu lava i aso uma lo tatou itumalo. Tou te matauina lelei au. Ou te le nofonofo te i ua ou oso atu i le taimi o le faigapalota. O le mea la lea, ia filifili tataua, fai lelei lau ekisi, aua e tusa lava pe ou te le faipule, e te vaai mai lava ia te au. O le mea la lea, faafetai tele.

Lau Afioga i le Fofoga Fetalai, o le a misia oe pe afai ou te toe tulai mai i le isi 5 tausaga. O le a le galo lau tuualalo, o se aoaoga tele foi mo i matou

nei e fou mai totonu o le Palemene, e te lava papale, e te lava onosai. E te iloa tausii le mamalu, atonu leaga o lo o e saofai i totonu o le faiganuu. O oe o lo o faamoemoe i ai le tofa ma le faautautaga le nofo lelei ma le filemu o afioaga. Ia manuia i le alofa ma le agalelei o le Atua. Soifua.

FOFOGA FETALAI: Malo faafetai saunoa i lau Afioga i le Sao. Faafofoga foi le itumalo aemaise o lo outou afioga, i nisi o mea o faapena ona faataoto. O lea ua ou vaai atu i le Minisita e le gata foi lea ae ua ou vaai atu i le Palemia, o la ua faamau i lalo. O Fogatuli foi a? O Fogatuli Papalii se i faamau lelei ifo, ina ia fai i ai galuega a le toeaia. A o faafofoga mai foi le itumalo, ia e sao le fautuaga, o tatou e faapena, o le uo lava mo aso uma, ae o le uso lava mo aso vale. E faapena le soifuaga lea tatou te i ai. Ia lafo ia i le itumalo o la ua faafofoga mai, ina ia faapena ona filifili ma le Atua i le sui e faapena ona agalelei i le itumalo ma faamalie le itumalo i mea o la e finagalo i ai e atiae ai le manuia o alo ma fanau.

O le avanoa leni mo se isi sui usufono e saunoa o lea e tele le tatou taimi, masalo pe toe toa-lua nisi sui usufono e saunoa e faasolo ai le tatou galuega.

O ai lena e tau mumu mai le moli i lena pito.

Afioga Fuimaono Teo Samuelu Teo: Lau Afioga i le Fofoga Fetalai, pe le o le avanoa lelei lea e tali mai ai le Minisita o Aoga aua o lea ua faafofoga le itumalo i le tupe foi lea na fuafua, aua le malae faava-o-Malo aua o lea ua toe faafoi. Ae pe le saunoa lelei mai po o toe i ai lava le tupe lena a si ou itumalo, se i tausaili le fanua e fai ai. Ma le agaga faaaloalo.

FOFOGA FETALAI: Ona o lou finagalo lava, aua o lea foi ou te faamauina. Aua ne i galo i sui mamalu o le isi vaega lena o lau galuega, ou te faamauina a outou saunoaga ma o outou finagalo. Ona ave lea, ia vaai uma lava sui usufono sa saunoa e taua le itu i galuega tau le Minisita o Aoga, ona ave foi lea o lau pepa, e na ona faamanatu i le Minisita o Aoga, o mea ia sa taua e le sui mamalu. O la e i ai le tupe, e toe lava o se elele. Se i tulai mai pea le Minisita o Aoga.

Afioga Hon Loau Sola Keneti Sio (Minisita mo Aoga, Taaloga ma Aganuu): E ui ina ou le auai i le Fonotaga i le taeao ona o nisi foi o tuatuaia le maalofia. A o lea sa faamaumau uma lava e au failautusi ia o Faaolesa ma Afamasaga ia mataupu e pei ona laugaina ma le isi au failautusi lea o Sili lea e i ou autafa. O lea la na ou musumusu atu i ai, a o lea e tau mai ia te au, o le tupe foi lea sa faagaga mo le malae faava-o-Malo. E taua le mea lea na faapena ona lauga ai le sui usufono mo Falealili. A o le tupe o la e i ai le tupe, a o le mea lea e tulai mai, o la e tau sue se fanua ina ia faapena ona faatino ai. Ua uma foi la ona ma feutagai ma le sui usufono, a maea loa ua maua le fanua, ona toe logo mai lea, ma faapena ona feutagai ma le

Matagaluega, ae faagasolo le faamoemoe. E pei o le agaga lena manu o lea e maua le avanoa.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui: Lau Afioga i le Fofoga Fetalai, ina ne i te i ua manatu... Alaala mai lalo... o se faata lea e avatu e le Minisita. O le mea moni lava, e le i uma le tatou Tala o le Tupe, e faatoa uma le Tala o le tupe i le masina o Iuni. A o lea tatou te ia Ianuari, o lona uiga la toe 5 masina ia e totoe e saili ane ai. A le maua loa i ina, ave loa i Piu, pe a le maua i se isi mea. O lau faalogo o la e manaomia e Piu se mea e tu ai, ae o le tulaga lena, o lea e ola pea le mataupu. Ae a faapea e uma atu Iuni ae ua leai a o tulai mai pea le Faigamalo lenei. Lau Afioga i le Fofoga Fetalai, e lelei ona silafia e le Maota lenei, o le atinae o fanau, atinae o latou nei o le au taaalo o le isi mea lea e ave pea i ai le faamuamua a lo tatou Malo. O lona uiga, e tataua ona sailiili pea le itumalo, po o fea e tu ai lo latou malae. A o au foi ou te tau te i i i, i le tele o mau malae, tele le mau malae. E ala ona ou taua le mea lea, ona o au na ou alu atu tatala le malae faava-o-Malo la e i o i le isi itu. Ai la o se... leaga o le itumalo o Falealili e tele. I le taimi na a o lua tofi e tasi lava le itumalo, a o le taimi la lenei, o lea ua lua itumalo, o lona uiga la o le isi malae mo le itumalo lea. Ae o le tualga lena o tatou polokalame o lo o fai nei, e uunaia ia malae taaalo, o fanau. Aisea? Leaga e le agai uma tamaiti ma teineiti i luga i mataupu o aoao, o le faafomai po o le faainisinia. E i ai le vaega e talenia i mea tau taaloga, ma ua ou fai sooa le upu lenei ona o lea tatou te iloa. E mafai e le tamaititi po o le teineititi i le taimi lenei, ona maua le miliona ma miliona ma miliona seleni i totonu o lana konekarate i totonu o le tausaga e tasi. A o le isi fomai ma le isi loa, e sau lava le valaau e le i taitai ona oo i sana 2miliona. O le tulaga lena o lea ua tupu i le lalolagi lenei, ua matua maoae lava tupe e maua e fanau aoga. O lea sa ou talanoa atu i le isi foi taimi, i le taaloga lea o le kirikiti, na amata tatou o tulaga 80 i lalo, ona o kirikiti a le lalolagi e vaevae i vaega e 2. O le vaega lea e 11 le aofai i luga, e i ai Niu Sila ma Ausetalia, ma le vaega i lalo ifo e oo i le 100. O le 100 e faaigoa o latou o kirikiti a Malo lagolago, associate membership, na amata atu ai la tatou i ina, i le taimi faatoa uma ona faatu malae taalo i Tuanaimato. Ona sua ai lea o le malae tele lena, e 5 tatou malae taalo lena e i ai i ina, ona o le agaga o le Malo i lena taimi, ia toe lalaga le taaloga lea o le kirikiti. Aisea? Na pau lava lea o le taaloga a Samoa na i ai faava-o-malo, na o le kirikiti na i ai. E muliga nei lava ona tatou taaalo i mea ia o liki ma lakapi, a o kirikiti lava sa taaalo ai. O le matou nuu e oo loa i le taimi o kirikiti, e leai se galuega e toe faia, e oo lava i tagata matutua, e matua omai lava, o isi e taaalo lava ua ova ma le 70 tausaga le matutua. O le taaloga lena a Samoa, ona o atu ai loa lea o tatou i fafo i mea nei o talaiga, ma avatu ai le tatou kirikiti faa-Samoa toeitiiti atoa le 4 futu o le umi o le pate, ia lea la na kirikiti uma ai ma Papua Niu Kini ma atunuu uma na tatou

o i ai, introduce i ai le kirikiti lea faa-Samoa, la ua kirikiti loaloa ai latou, ua sili atu le latou kirikiti nai lo tatou. O lea la ua toe lagalaga i le kirikiti, ma lo outou silafia, o lea ua toe faatulaga i le lelei o le tatou taalo, o lea ua tulaga 11 tatou i le faatulagana i le lalolagi, o le vaega lea numera lua. O lona uiga, e le toe mamao pe alu alu i le isi 3 tausaga, ua i ai tatou i totonu o le vaega maualuga, o le matua tele o le seleni ma le taleni lea e i ai i i, a o le mea matautia lea ua tulai mai, pei ona silafia e le tatou taaloga a le Pasefika i le tausaga lea na tea nei, na pine auro tamaitai, ae pine foi lea numera 3 bronze ia alii. O lea la ua aliali mai i i, o lea ua tauave e tamaitai le maualuga o le taaloga kirikiti, o lea foi la ua toe taumafai i ai tama, a ua maualuga lava le tulaga lea ua i ai kirikiti.

I totonu la o malae ia e 5, ua avea nei Samoa ma atunuu, pau lea o le atunuu o lo o i ai ni malae se 5 faava-o-Malo i totonu lava o le pe a ma le 5 eka lea e i ai nei i Tuanaimato. Na o tatou foi la e mafai ona talimalo i se taaloga faava o Malo ona e atoa uma malae i i nai lo isi atunuu e vavamamao mea e tu ai malae, tu le isi malae po o Apia ae tu le isi malae i Asau, e mamao. O le ala lena e faigofie ai i atunuu ia i fafo o le itulagi lenei ona fai mai iinei taaloga faava-o-malo. A matau mai la i lau tautalaga, o le tele ia o le uunai lea e uunai nei. O le ala lena lea a ou le Taitaifono, ou te faa-Tama i le kirikiti, o le lakapi, o le golf, o piiga, o le soka, o le aau, o le fanafana au. E ala ona ou i ai i mea nei, o le uunaiga o tatou fanau, uunai taaloga ina ia agai i luma taaloga. O le ala foi la lena o lea e umi ai lou ola, ona ou te alu lava i i ma ou savalivali ai ma maua ai si ou malosi. Ae ala ona ou aafia ai, o le uunaiga o mea nei o taaloga ia tulai mai se Samoa ma ana tama fanau i le faatumutumuga, a faaletonu mai le faaloia, ae lave mai le tulaga faa-taaloga. O lea foi la ua ofi Samoa i totonu o le Iuni Lakapi, o le Komiti e Pulea Lakapi a le Lalolagi. O lea a ua tatou tau tau tau ma finau, lea ua saofai ai Samoa. O lea foi e saofai Samoa i totonu o le soka, lea e saofai Samoa i totonu o kirikiti i mea nei o taaloga faava-o-malo.

O le uiga o lea tulaga lau Afioga, o lea e tau tau atu nisi o pine faamau e avatu ai le faataua o mea nei o taaloga i le tatou Malo. O le mea la lea, aua le popole i le tou malae, leaga o lea e ave i ai le faamuamua. A maua loa se fanua logo loa le Minisita. E oo foi la i le matou nuu o Falevao, ua leva ona ou fai atu i ai, sue mai se fanua e fai ai se tatou malae, ae oo mai nei, o la e lava e paovale lava i le mea lea o le toto atu o le tiapula i i, toto ane le mea i o, ae le o lautele le mafaufau. O le tulaga la lena, atonu e uma atu lau lauga ou te alu atu fai le isi matou fonu ua maua se fanua e fai ai le matou malae. O lea foi ua i ai le malae i Falefa. O le agaga lea o le Malo, ia tofu malae uma itumalo uma po o nuu foi. E pau lava le agaga, ia, o manava o maileia ina ia tele ni tupe e fau faasoloatoa ai malae, ia malae loaloa le tatou atunuu aua tatou fanau. O ai ea e fai i ai nei mea? O ai e fai i ai nei mea? Afai o au o matua fanau, fai mo a tatou fanau aua le lumanai, aua o le lumanai lena o Samoa, o fanau a Samoa, o taitai na o le lumanai.

Lau Afioga i le Fofoga Fetalai, ia o le faamalosiua lena o lea ua tali atu le Minisita, ne i te i lava ua faapea o se tali faapolokiki, e le o se tali faapolokiki. O lea e totoe masina e fai ai la outou galuega. A leai foi, ia e le uma le fai aso o le Atua. Ia manuia le Fono.

FOFOGA FETALAI: Malo. Se i... o lea ua...

Afioga Fuimaono Teo Samuelu Teo: Lau Afioga i le Fofoga Fetalai...

FOFOGA FETALAI: O lea ua tali le Malo. Vaai foi i lou atamai tele o lea ua talanoa le Palemene, o lea ua alu lau faalua. O lea la ua saunoa le Palemia e faamalamalama lou finagalo. Ia, e a e i ai se isi mea faaopoopo i le faalua?

Afioga Fuimaono Teo Samuelu Teo: E leai na o le agaga o le faafetai i le Afioga i le Taitai o le Malo ma le Minisita, o lea foi ua faafofoga le itumalo. Pau lava le agaga ne i te i ua muamua Falevao ae mulimuli Falealili. O Falevao lava ia e le aoga i ai se malae taalo aua e lelei lava latou ia i le palu ula ma le tuna, e le aoga la i ai se... E faamanatu atu foi i le Taitai o le Malo, leaga o lea e tele asosi ia e faa-Tama ai, ne i galo ia ia o lea e faa-Tama i le Asosi a nai o tatou uso faafafine. Mo le silafia ne i te i ua galo.

Afioga Alaiasa Muagututia Moefaauouo Malagaitutogiai Sepulona Moananu (Anoamaa Sasae): Lau Afioga i le Fofoga Fetalai...

FOFOGA FETALAI: Ia se i tulai mai le... Se i onosai mai lava le sui usufono o Falefa. E pei a avatu le alofa o le Malo ma mea o le a e tuuaiina ai le... O le a le mea e le... A faaletonu loa i le tuai ona maua se tou malae, amata i le malae voli, amata loa i le malae voli. Ioe.

Ia se i tulai mai le sui usufono o Falefa lau Afioga Moananu, le Susuga Lufilufi.

Afioga Alaiasa Muagututia Moefaauouo Malagaitutogiai Sepulona Moananu: O lea sa saunoa mai le sui usufono mamalu i le Minisita, o lea ua saunoa le Minisita fai mai o lea e faamaumau e le Failautusi le tulaga o saunoaga a sui usufono. O le mea tonu lava lea sa ou le faamauina ai le saunoaga a le sui usufono lea, leaga e tele mea o le le maua o se fanua, ae ou te mataua lelei lava e leai ni taleni o i Falealili, ioe. Na pau lava le sui o Falealili na alu i le au lakapi, o le tama lena na kikia le polo leai ni seevae i tai i le Apia Park. Ae oo loa la ua alu i le tour i Niu Sila ua fai seevae, ia e kiki atu le polo ae totolo aua e le masani i ni seevae. O le mea la lea, ia taatia ia le malae o Falealili aua e maumau ai le... ae fai le malae o Falevao aua o

Ia e i ai tamaiti Falevao e mafai ona omai e sui le atunuu aua le faalagamaea. Ia manuia le tatou Fono.

FOFOGA FETALAI: Malo.

Afioga Fuimaono Teo Samuelu Teo: O le mea e fia faasao lau Afioga, o le tama lena e le o se tama Falealili, o le tama na nofo i le aiga Falealili, ae le o se tama Falealili.

FOFOGA FETALAI: Ia pe i ai se isi...

Afioga Faumuina Asi Pauli Wayne Fong (Nuu Tu Taulaga i Sisifo): Lau Afioga i le Fofoga Fetalai, semeamanu lea ua maua si ou avanoa lea i i leaga o lea sa afea i lau lauga le tulaga lea. Na ona fesili atu lava i le Afioga i le Minisita aemaise foi le Afioga i le Palemia, po o le a le mea na ala ai ona le faia le faleaoga o Vaigaga lea foi e faatali mai matou tamaiti. O lea na maua mai le fesoasoani mai o i le World Bank, ae o lea ua toe aveese, a o lea tatou te talanoa i malae lakapi, a o lea lava e faatali le aoga i le faleaoga ua uma ona pasia. Ia na pau lava lena o se fesili. Ma le faaaloalo lava faafetai.

FOFOGA FETALAI: Ia, se i saunoa mai lau Afioga i le Minisita, aua e te saunoa e tali i le tulaga lea se i uma ona ou fai atu lea.

Afioga Hon Loau Sola Keneti Sio: Lau Afioga i le Fofoga Fetalai, faafetai. Ia manu o maua le laolao, o lea foi e matau atu ua uma ona faamalamalama e le Afioga i le Palemia le tulaga e pei ona saunoa i ai le sui usufono mo Falealili. Ia o le agaga tonu lena. A o malae, o lo o faapena lava ona faagasolo, e sao, o la e foi e i ai le talosaga a Falevao, a o le agaga lena o lo o tau saili foi se fanua laugatasi ma e talafeagai mo le malae. Ia ae ua taua foi lenei taimi aua leaga o lea ua tatou talanoa i taaloga, e faapena foi ona avatu ai se motugaafa leaga sa lauga ai le isi sui usufono ananafi ma ona taua ai, fai mai po o le a le mea ua faaletonu ai le tatou Taitoafitu, ae pei e foliga mai ua tuuai mai ia te au. E ui o lea, e sao le Afioga i le sui usufono, o lo o faapena ona le o mautonu foi le tatou au i lenei taimi, ona o tamaiti foi ma foliga vaaia. E ui o lea, ou te alu atu i le isi aso, o la e fai mai latou toleniga talu ai nei a, ona ou fesili lea i le faiaoga ou fai atu i ai, o le a ea le mea e ala ai ona faapena ona le mautonu le tatou au? Ia ae le fetuunai ma... ae fai mai le tali a le faiaoga, se ua uma metotia o le koleniga. Ona ou fai atu loa lea i ai, vaai oe, a oo taeao, a omai tamaiti ona koleni lea faau i lalo ulu ae faau i luga vae. Ioe. Tasi lena vaaiga, aua o le mea lea e tulai mai, e le o malolosi lima ma tauau o tamaiti. E afio atu la le Taitaifono aua o le Afioga i le Palemia e Taitaifono ai, ua ese le faiga o koleniga ia ua fai mai ina ua u i luga vae ae u i lalo lima ua faaoga lima e tamomoe ai. Ioe. Na ma toe

talanoa nei la ma le faiaoga fai mai ia te au, Loau ua ese le tulaga lea ua i ai le malolosi o tamaiti. Aisea? Fai mai ua lelavava tamomoe i lima, o la e o le a le toe foi i vae, ae o le a sui la le attitude. Ioe. O i ina la lea e... Atonu la o isi a tatou taaloga ia o le a aumai, ua aoga foi i le fesili a le sui usufono, ia o le a tele le suiga o le tatou au.

A o le faleaoga lea e saunoa i ai Faumui, o la e foi ua uma ona faataatitia fuafuaga a le Matagaluega, ae aua e te popole, e fai lava lou faleaoga ae le i uma le Paeaiga lenei. Ma le agaga faaaloalo.

FOFOGA FETALAI: Malo. Ia, e ese le manaia o lea ua... ia se i silasila la i ai o lea ua alu, lea ua tali le finagalo o le la sui usufono mo Nuu Tu Taulaga i Sisifo e faapea foi Falealili Sasae. Ia tautuana o le fautuaga a le Nofoa i lau Afioga i le Minisita e aafia i le tulaga lea, tusa lava pe le agavaa, se e fai fai lava lelei, ioe, ae koleni pea, e faifai lava lelei, e faapena.

Ia, ona o lea ua tatou tualata i le taimi e manava ai le tatou galuega, ona i ai lea o le manatu malo le tofa, e faapena e alu alu suataga o le vaatele i saunoaga ma fetalaiga, tatou te tua lava i le finagalo o le Atua. E tua i nuu lelei, ioe. O le mea la lea, aua ne i talaaa ma afifio sui usufono o le Palemene a o ita se isi i le isi, o totonu lava o le tatou fonotaga, ia taoto lava i totonu o le Palemene saunoaga ma fetalaiga, aua le ita le isi i le isi, tatou maua le loto faamagalo. E faapena le agaga, ae faapena foi le matau tapuai mai a Ofisa Sili o Pulega o Matagaluega ma Faalapotopotoga a le Malo, aemaise foi o le atunuu. Ona ou faapea lea, o le a faaiu e le sui usufono mo Nuu Tu Taulaga i Sisifo lau Afioga Faumuina le tatou fonotaga i se tatalo.

Na tolopo Taulumaga a le Fono Aoao Faitulafono i le itula e 12:50 i le aoauli seia aulia le Aso Tofi, 21 Ianuari 2021 i le itula e 9:00 i le taeao.